

皇明大政紀

皇明大政紀卷之七

臣豐城雷禮謹輯

餘姚朱錦謹校

金谿閔師孔謹訂

庚寅永樂八年正月戊辰朔。

上御奉天殿受賀。大宴文武羣臣及四夷朝使。

辛未召鎮守寧夏寧陽侯陳懋隨征漠北。

以親征胡虜遣書諭皇太子代告天地宗廟社稷。

命故富陽侯駙馬都尉李讓子茂芳襲侯爵。

設雅州守禦千戶所橋關。

甲戌享太廟皇太子行禮。

丙子。以將祀南郊。百官受誓戒于文華殿。

塞古北路口小關口及大關。外門僅通一人。

交趾總兵官英國公張輔敗賊餘黨阮師檜于潮州。

初師檜僞稱王。與僞金吾上將軍杜原措等據東潮州安老縣宜陽社。有衆二萬餘人。時出黃江麻牢江大全等處海口爲寇。以應簡定。至是輔以兵圍宜陽社。賊衆拒戰。官軍水陸皆奮。矢石交下如雨。賊大敗。斬賊首四千五百餘級。溺水尤多。生擒僞監門衛將軍范支僞羽林衛將軍陳原卿僞鎮撫使阮人桂等二千餘人。皆斬之。斂其屍爲京觀焉。

己卯。大祀天地于南郊。皇太子代行。命禮部尚書呂震

復命。

自是遇巡幸皆命代行。

甲申。皇太子除肇慶府絕戶租糧九百八十餘石。

乙酉。勅遼東都指揮儲欽巫凱於原調官軍選步軍五千。委能幹指揮領還備寇及防護屯田。其官軍并朝鮮所進馬。令赴北京隨征。

丙戌。築北京至居庸關鋪舍。

關內關外每三十里築烟墩一所。

丁亥。命禮部加賜爪哇國使臣路費鈔。

辛卯。茂州衛軍沈連言二事。悉從之。

連言舊制禁綿布不許販賣出境。今茂州威州疊溪距

松潘產馬及通番商人處甚遠。而綿布一槩禁約。軍士無以爲衣。若但申嚴出境之禁。許綿布得至茂州。疊溪。庶幾軍士有以禦寒。又言茂州古成都屬郡。其民都是兩川流移來者。亦頗知禮法。不同生羌。若開學設教。使沐浴聖化。亦足以彰聖朝治道之盛。

夜有星大如盞。青白色。尾跡有光。出文昌西。北行至近濁壬辰。詔濟寧迤南至北京。水陸輸運軍需之民免差役一年。

命北京行部尚書郭資率所屬民丁萬人隨軍餽運。入賜鈔五錠。仍給行糧。

癸巳。皇太子以去年江北水患。遣都察院右副都御史

虞謙戶科給事中杜欽往楊州淮安鳳陽直抵陳州視軍民疾苦免其年被災田租贖還典賣子女。

甲午書諭 皇太子畱守總軍國之務事無大小宜審度而行務合中正。

大寶法王哈立麻贊善王吉刺思巴監藏巴里藏卜等各遣使來朝 賜鈔幣衣服等物。

夜有星大如雞子青白色有光出天厨西南行至雲中。

乙未諭從征將士胡寇違天逆命殺害朝使荼毒邊民非一朝夕今朕躬行天討爾等宜共撫謀奮勇驅逐此虜永享太平。

交趾總兵官英國公張輔等奉勅召還奏賊首陳季擴賊

黨阮師檜胡具鄧景異等未殄滅請畱都督江浩等領雲南福建廣東江西都司四川福建二行都司荊州南昌武昌廣西護衛官軍聽黔國公沐晟調用以雲陽伯陳旭爲副將從之

皇太子諭工部侍郎陳壽揚州淮安鳳陽至陳州去歲水災有工匠在京應役者悉遣還令營衣食

丁酉交趾總兵官英國公張輔差指揮朱福等檻送僞大越上皇簡定拜僞太保等官陳希葛阮汝勵阮晏武世僚等至京師伏誅

二月戊戌朔勅皇長孫畱守北京命戶部尚書夏原吉會官議畱守事宜

勅黔國公沐晟仍充總兵官。雲陽伯陳旭充副總兵。率師征勦交趾餘寇。

女直野人頭目那溪等十九人來朝。命爲甫兒河使坊。河亦麻河。三衛指揮等官。賜誥印冠帶襲衣及鈔幣有差。庚子。戶部尚書夏原吉等進所議北京畱守事宜。

辛丑。以親征胡虜詔告天下。

命戶部尚書夏原吉輔導。皇長孫。仍兼行在吏戶兵三部事。

諭曰。朕長孫雖今幼齡。而克勤學問。正當涵養德性。充其大器。爾其勉盡乃心。朝夕輔導。俾智識益廣。道德有成。紹成有賴。爾亦與有光榮。欽哉。賜吉米二十石。鈔一



千貫。

命趙王高燧整理北京城池軍馬。令廣平侯袁容泰寧侯陳珪輔導之。

壬寅。居靈州都司阿灘不花等來朝。貢馬。賜之鈔幣。

癸卯。命國子祭酒胡儼兼翰林侍講。掌翰林院事。

裁革鎮夷千戶所平樂通源泉水三驛。

甲辰。都察院劾應天府尹姚恕非京尹才。皇太子降爲

浙江布政司右叅議。

廣德知州楊翰以公事稽程逮京。耆老二百餘人詣闕言翰善撫字。乞貸罪還職。皇太子以小過可恕。遣行人就道宥之。復職。仍賜翰鈔三百貫。

乙巳諭 皇太子用刑貴在得中。

諭曰前命爾覆審重囚。爾奏乞貸其死。見爾重惜人命。然十惡不可宥。其餘雜犯。死罪以下。悉准所言。國家用刑。貴在得中。過則濫。不及則弛。自今尤宜盡心。

法因河等處野人頭目禿刺等朝貢。命爲法因河兀應河二衛指揮等官。賜誥印冠帶襲衣及鈔幣有差。

丙午。北京耆老以車駕將發。詣朝辭。上以此舉爲民諭之。命禮部悉賜布鈔。

哈烈沙哈魯把都兒遣頭目貢方物。上因其與姪哈里構兵。遣使勸沙哈魯及哈里各罷兵睦親。并以綵幣賜之。安王楹奏免護衛屯軍子粒二年。從之。

丁未遣官釋奠先師孔子。

以親征胡虜。懷於承天門。遣官祭太歲旗纛等神。

車駕發北京。親征北虜。本雅失理。命翰林學士胡廣庶子

楊榮諭德金幼孜扈從。

遣指揮完者帖木兒賫勅及絲幣賜別失八里王馬哈麻。

夜有星大如雞子。青白色。尾跡有光。出右攝提。南行至近

濁。

戊申。皇太子代祭大社稷。

遣官祭先農。

車駕次沙河。陞鰲山衛指揮使管八禿帖木爲山東都指

揮僉事。

已酉車駕次龍虎臺。遣行在太常寺少卿朱焯祭居庸

山。行在工部尚書吳中言。營建山陵合用工匠民夫。請於山東山西河南北京及於浙江等布政司直隸府州縣徵用。并北京附近衛所量撥軍士從之。仍命有司月給糧賞。庚戌車駕次永安甸。雨雪已而復霽。日下五色雲見。戶部啓江西新城縣民永樂五年八月多疫死。民田四百八十餘頃俱荒。官覈實除稅。皇太子從之。

壬子德慶州新落山等處徭首駱第二等以龍水縣丞馮原恭招諭嚮化。來朝貢方物。皇太子賜之紗幣襲衣。戶一百六十口五百餘。

夜有星大如雞子。青白色。有光出女床西北。行至游氣。

癸丑 皇太子諭都察院左都御史陳瑛戒勵五城兵馬。專以巡警京城。使各修厥職。

巡按直隸監察御史劉煥劾啓治水蘇湖左通政趙居住田多荒蕪。蔽不以聞。惟簡烏程熟田穗繁。其穀粒及三百之上爲乘。稱瑞罔。上宜加誠責。皇太子以上之所使。未可擅易。封此章示之。令自省。

甲寅 車駕次泥河。見病卒。命馬載至營。遂諭諸將撫卹軍士。令太醫院遣醫分療各營將士之病者。

浙江道監察御史陳孟旭等劾啓中軍右都督郭義已給皂隸。又擅用軍士二十餘人充僕從。於法當罪。皇太子

以義武人不諳法。姑釋不問。悉收其兵士還伍。

丙辰。遣行在太常寺卿朱焯祭宣府山川城隍。

丁巳。駐蹕宣府。閱武營內。

戊午。修太廟及社稷山川先農壇。

壬戌。車駕度德勝關。駐蹕興和。遣官祭所過名山大川。

癸亥。命鎮守大同江陰侯吳高操練山西大同天城陽和等處軍馬。整理城池。節制山西都司行都司及大原三護衛官軍。

四川通海寺三井鹽課司竈丁李奉春言祿聚井鹽煎不及額。宜開中江縣金佛竹筒水鹽井。補所虧鹽課。皇太子從之。

甲子駐蹕興和閱武營外

上指揮將士坐作進退折旋無不如旨顧尚書方賓學士胡廣侍講楊榮金幼孜曰節制之師庶幾可用然教練貴熟孔子曰教民七年可使卽戎朕每御師未嘗恃其已習而輟操練故往往得用

英國公張輔至自交趾入見命提督操練宣府萬全興和等處軍馬整治城池屯堡烟墩仍聽趙王調用

勅清遠侯王友循野狐嶺德勝口安武侯郭亨往宣府萬全督餽運

浙江黃巖縣言民被水患乏食乞免永樂五年六年鹽糧仍乞今歲稅糧折鈔皇太子從之

乙丑。大閱兵興和。

勅戶部運糧民夫死者與鈔十錠。及凍傷手足者俱復其家一年。

三月丁卯朔。命清遠侯王友督中軍。安遠伯柳昇副之。寧遠侯何福督左哨。武安侯鄭亨督右哨。寧陽侯陳懋督左掖。都督曹得都指揮胡原副之。廣恩伯劉才督右掖。都督馬榮副之。

戊辰。命都督劉江等充遊擊將軍。督前哨都督薛祿。冀中等充驃騎將軍。都指揮侯鏞。陳賢等充神機將軍。都督金玉等充鷹揚將軍。都指揮李文等充輕車將軍。

葛稱哥野人頭目斜稱哥等來朝。命爲葛稱哥衛指揮。



千百戶鎮撫賜誥印冠帶襲衣及鈔幣有差。

夜有星大如碗赤色光燭地出太微東垣外西南行入太微垣右執法星旁。

庚午福建清流縣耆老赴闕陳刑部員外郎宋忠前知清流勤於撫字政平盜息乞復任。皇太子陞忠汀州府知府。

辛未琉球國中山王思紹遣姪三吾等來朝貢馬百一十匹。皇太子賜鈔幣。

工部言淮安府淮河南岸朔圯延及倉廩墻垣宜令有司脩築。皇太子從之。

陝西涼州衛及永昌衛韃官千戶虎保亦今真巴等叛殺

虜人口。皇太子命都督費瓛爲總兵。刑部尚書劉觀參贊軍務。討之。

壬申。命忻城伯趙華守官府。仍聽英國公張輔調遣。勅鎮守大同江陰侯吳高軍士隨征者。苟有畏避及強劫去人財。皆斬以徇。

命湖廣浙江江西都布二司各運糧赴北京。備官軍俸糧。湖廣一百三十萬石。浙江一百五十萬石。江西三十萬石。

脩直隸鎮江衛城。

甲戌。駐蹕鳴鑾戍。瓦剌順寧王馬哈木遣完者帖木兒等貢馬謝恩。賜綵幣襲衣。

皇太子召前北京行部左侍郎喬穩於交趾謫所。復爲北京苑馬寺卿。

乙亥。上大閱。誓師於鳴鑾戍。

時軍陣綿亘數十里。師徒甚盛。戈甲旄旌輝耀蔽日。鐵騎騰躍。鉦鼓鉦震。瓦剌使者望之駭愕。曰。天兵如此。孰敢嬰其鋒者。上聞之。顧謂學士胡廣等曰。國家無所用兵。乃善。朕久厭之矣。今日此舉。非得已也。然治兵最難。纖毫舉動當致謹。廣曰。孔子所慎。齊戰疾。上曰。孔子言。吾戰必勝。祭必受福。惟誠敬之至。其効可必。廣曰。誠如聖諭。

上罷閱。召諭從征將士。以唐薛仁貴。宋狄青自勉。悉賜之。

酒食。

都察院右副都御史虞謙給事中杜欽啓潁州及潁川衛軍民缺食請廩賑貸。皇太子遣人馳諭發倉賑之勿緩丙子。車駕次凌霄峰登絕嶺望漠北。

上顧學士胡廣等曰。元盛時此皆民居。今萬里蕭條。惟見風埃沙艸耳。虜勢衰微若此。尚敢倔強。果何所恃哉。因問廣等曰。諸將此來。不聞進一言何也。對曰。成算在上。星火之輝。何能上裨日月。上曰。是何言也。聖人有資於芻蕘之言。何況君臣之間。古稱好問則裕。自用則小。朕有所爲。必盡衆人之情。曷嘗專任一已以掩其策。時少水。夜大雪尺餘。軍中足用。

遣瓦剌使者歸。復賜勞順寧王馬哈木賢義王太平安樂王把禿孛羅各綵幣二十疋。

丁丑。皇太子命戶部從四川南部內江二縣各言議井鹽大通溪口山皮袋井鹽開煎。

四川茂州衛軍人金有祥妻吳氏一產三男。事聞。皇太子令循例優給。

戶部啓四川鹽課提舉司言小溪牛井鹹水減少。開梅旺井煎補增千一百五十二斤。中坝井土石填塞。開龍透井煎補增千八百斤。宜以今增數爲額。皇太子從之。

脩鎮江府丹陽縣練湖塘。

庚辰。勅凡供具減半。

命口北設軍坊黑峪土墓三巡檢司。隸隆慶衛。槍桿嶺鶴兒嶺雞鳴山三巡檢司。隸宣府前衛。

辛巳。命都指揮章安等充輕車將軍。同尚書吳中督餽運赴平胡城。

滁州知州陳璉以治最聞。皇太子召至京。州民赴闕乞留。特陞揚州府知府。仍掌滁州事。賜襲衣及幣。命禮部宴之。

甲申。車駕次錦衣磧。前鋒報見虜蹤跡。下令各軍嚴警備。

乙酉。皇太子以與脩永樂大典茂名知縣董子莊爲國子監司業。

夜有星大如盞赤色有光出漸臺東北行至近濁。

丙戌。車駕次環瓊圃。勅各營謹哨瞭。

丁亥。交趾副總兵雲陽伯陳旭卒於軍。皇太子命賜如

例。

戊子。車駕次金剛阜。勅遊擊將軍都督劉江先據清水

源山嶺以俟。

己酉。左都御史陳瑛啓蘇州妖婦鄒氏誣降邪神當絞其

子梁何往屢乞代死。皇太子曲宥其死命杖遣之。

辛卯。脩河南汝陽縣汝河堤岸。

癸巳。皇太子諭後軍都督府聞山西寇盜出沒其衛所

官軍揆補者除今年屯種子粒。

丙申。駐蹕清水源。去營六七里。地忽出泉。溢數畝。士馬飲之不竭。賜名神應泉。

雲南金沙江土官巡檢李瑛等四川馬平府平夷長官司副長王福等各來朝貢馬。皇太子賜之鈔幣。

四月丁酉朔。命皇太子代享太廟。

撫寧縣老人張甫通遷安縣老人何彬俱督運至清水源。上聞而嘉之。各授本縣縣丞。免視事。

雲南陀安安撫司土官安撫匝各瓦刺次和長官司長官張首皆遣人貢馬。謝受職恩。西番里陀等處土官知府各及八男阿寺等及碍直地西頭目刺馬必遣弟合失伯來朝貢馬。皇太子賜鈔幣襲衣有差。



戊戌。上與諸將議餽運用車。

有言沙磧車運行遲。不若人負之便。上曰。任重致遠。水莫如舟。陸莫如車。舟遇淺車遇沙雖遲。如舟出淺車出沙。人力所不能及矣。十人運一車。或缺一二人。尚堪挽之以行。用人負者。一人有故。必分於衆。以一累十百。不尤難哉。遂用車。

交趾布政司掌司事工部尚書黃福言五事。桂陽知縣梁善言二事。俱奉 皇太子令旨。下禮部會議。

福言大軍征安南。俱瘴癘之地。行者艱難。今詢得瀘江北岸小河。直通盤灘。下至新安府靖安州。萬寧縣抵廣東欽州。水路止十站。欽州至靈山縣入廣西橫州。陸路

止三站。比舊行之路水路減半。乞令廣東廣西二布政司差官量道里設水馬驛站遞運所。并相其要害去處設衛所巡檢司。鎮禦賊盜。既免瘴癘。又便往來。二言官軍用不足。乞名雲南等處開例中鹽。庶便商賈通行。糧食不乏。三言交趾官吏軍民多於原籍。携家前來。間有事故遺下人口。欲還鄉里。路遠艱難。乞爲定例。給與脚力行糧。庶不失所。四言曩爲交趾軍儲不足。奏請住支軍民衙門官吏月糧。量撥荒田。俾自種食。其軍職有干原任支俸者。各衛所首領官吏典。仍支食米。卽今倉無積粟。宜將食米并行住支照例撥田種食。爲便。俱議行之。惟五條言三六年循例給由。恐路遠虛曠。候九年給

由送部以憑黜陟。惟倉官巡檢依例給由。善言郴州距廣東海北提舉司支塩止二千餘里。今令往兩淮支塩水陸六千餘里。不便議照舊例。又軍戶一丁應合承繼者。仍令補役。田土付丁多之家佃種。如果無人承種。准開糧額。皇太子皆從之。

庚子。行在各營中。夜刀戟皆有火光。

夜有星大如雞子。青白赤色。尾跡有光。出紫微垣內。后星旁。西北行至北斗魁。

癸卯。車駕次玄石坡。上制銘。使勒於立馬峰之石。

銘曰。維日月明。維天地壽。玄石勒銘。與之悠久。

甲辰。日本國王源義遣使圭密等奉使貢方物。謝賜父誼。

及命襲爵恩。皇太子賜鈔幣有差。

乙巳。皇太子令旌表撫州府樂安縣民陳伯榮妻鄧氏。安東中護衛百戶陸阿葛妻倪氏。應天府江寧縣民陸留妻張氏。向官童妻汪氏。上元縣民王勝一妻沈氏。陶官真妻諸氏。張五妻俞氏。俱貞節之門。

夜月犯靈臺上星。

丙午。江寧知縣王愷言。工部近於龍山官民田地置厰儲木。乞蠲除稅糧。皇太子從之。

戊申。車駕次楊林。戊以深入虜地。免諸將朝。

己酉。琉球山南王汪應祖遣使乃佳吾斯右貢馬。賀萬壽聖節。皇太子賜之鈔幣。

庚戌廣西總兵官韓觀以疾聞。皇太子謂觀在廣西久甚盡心蠻夷畏服。遣醫往視。仍遣行人牛埭問疾。賜觀鈔二千貫。

壬子。車駕次擒胡山。上制銘刻石。賜名靈濟。銘曰。瀚海爲鐔。天山爲鍔。一掃胡塵。永清沙漠。以明日。萬壽聖節。勅免文武羣臣賀。

瓦剌順寧王馬哈木等遣舒黑的兒等來朝。賜宴勞之。甲寅。車駕次廣武鎮。賜其泉名清流。上制銘。銘曰。於爍六師。用殲醜虜。山高水清。永彰我武。

乙卯。夜。月犯十二國之秦星。

丁巳。脩寧國府南陵縣野塘圩畔蕩堤。

戊午。四川鹽課提舉司奏請開井研縣捲市井龍子井煎鹽戶部以聞。皇太子從之。

己未。女直野人頭目塔因哥撒因加等來朝。皇太子命爲兀里奚山等衛指揮千百戶。賜鈔幣有差。

庚申。車駕次威虜鎮。無水。命以駝於廣武鎮載水賜衛士。

日暮。上猶未食。中官請進饌。上曰。軍士未食。朕何忍獨先飽。令人視各營軍士皆食。始進饌。

孟良府土官知府刀交及茶山黑麻長官早張刁思發各遣頭目貢馬。皇太子賜之鈔幣。

壬戌。車駕次玄雲谷。聞涼州韃官叛。命都指揮僉事史

照充總兵官鎮守涼州等處。凡土軍土民有梗命者勦之。車里宣慰司刁邏答遣孫刁珀等貢象馬等物。皇太子賜錦綺鈔羅有差。

陝西按察司奏平涼臨洮等處撥輸甘肅永昌寧夏莊浪永樂六年七年稅糧芻茭民困災傷運至中塗車摧牛死不能前進致逋負者多。皇太子命戶部停徵免被災之民徭役一年。

都督費璵等敗叛虎保等於雙城。

時虎保等屯番城東相距百五十里。璵進軍勦之。賊來搏戰。且詐言欲降。旣而引退。復相遇於雙城。璵以兵擊其左。陳懷等擊其右。賊大敗走。所殺傷甚衆。斬首三百。

餘級追奔至黑魚海獲賊屬千餘馬駝牛羊十二萬有奇虎保等亦令真巴等遠遁獄等遂還

甲子 車駕次長青塞賜其泉名王華

乙丑 皇太子令設河南衛輝提舉司

五月丁卯 車駕發順安鎮臨臚胸河登山四望賜名飲馬河營於平漠鎮

羽林前衛故指揮同知賈浩子福等三十一人乞以父功免比試照例優給襲職 皇太子以武官子弟不開弓馬緩急何用命都督府依例比試不中者罰

播州宣慰司楊升并思恩州土官岑永昌各遣人貢馬

皇太子賜賚有差



漢中府金州大水。壞城垣倉廩。漂溺人口。事聞。皇太子命戶部速遣人撫視。

夜有星大如雞子。青白色。有光出東南雲中。東北行至近濁。

戊辰。駐蹕平漠鎮。遣都督冀中祭飲馬山川。

庚午。車駕次蒼山峽。哨騎獲虜謀者五人。及指揮欵台獲虜馬四匹來獻。

甲戌。車駕次環翠阜。胡騎指揮欵台獲人。詢知本雅失里在兀古兒札河。晚。遂度飲馬河下營。

皇太子命戶部賑直隸滁州宿州饑民。

脩廣東松茲縣張家坑何家洲堤岸。

乙亥。命清遠侯王友廣恩伯劉才領官軍於飲馬河上築殺胡城住劄。

上率精銳騎軍循飲馬河西北行。胡騎都指揮婁鬼力獲殺虜人口孛畜。命送殺胡城。仍勅王友等撫養之。

丙子。車駕發聞喜岡。勅諸將以次前進。避山取道。毋疲困士卒。

丁丑。車駕次平虜鎮。用韃靼百戶爲鄉道。

工部言山東平度州濰河及浮糠等河水決壞堤堰。請遣官脩築。皇太子從之。

交趾總兵官沐晟統軍敗賊首陳季擴於虞江。追至會潮靈長海口。生擒神龍將軍黎弄。斬首三千餘級。

戊寅。車駕至兀古兒札河。虜先遁。賜名清塵河。夜倍道追之。

交趾總兵官沐晟遣都督僉事江浩與賊黨鄧景異等戰於魯江。不利。都指揮孫全亦戰死於爭江。

己卯。車駕追虜至幹難。擊敗之。本雅失里以七騎遁去。獲馬驢牛羊生口無筭。

皇太子令設陝司茶馬司。隸本布政司。

辛巳。諸將以所俘把禿帖木兒等男婦百餘人來朝見。上命皆釋之。

旋師次五原峯。勅清遠侯王友等簡精銳士卒候征阿魯台。

壬午。駐蹕五原峯。命都督薛祿祭幹難山川。賜名玄冥池。

皇太子復遼東辦事官滕宗智仍爲廣東道監察御史。宗智初以御史坐累謫爲辦事官。旣還。有薦其才者。故復之。

巡按廣西御史李賢啓橫州海橋增設遞運所。以便復往并乞除免從征亡沒者幼男寡婦子粒。皇太子悉從之。癸未。車駕次清塵河。指揮萬忠獲虜四人。至命釋縛留隨征。

國子監司業董子莊啓請如南監例置典籍一員。專掌書籍。皇太子從之。

丙戌。車駕次飲馬河。遣都督指揮李文中。中官海壽。賞書諭皇太子。遂下詔班師。

上謂兵部尚書方賓。學士胡廣等曰。朕爲宗社生民。不得已遠征逆虜。翼一勞永逸。今首惡已遁。其衆敗散。朕當旋師。且休兵息甲。嚴守備。更務屯田。使兵堅邊實。虜不足慮。賓對曰。宗社生民之福也。

丁亥。車駕次殺胡城。勅成安侯郭亮。督餽運赴應昌。命清遠侯王友廣。恩侯劉才。領將士先赴開平休息。

時諜報虜僞知院失乃干潰散走。西至廣武鎮。欲率衆來降。遣指揮廓廓帖木兒等招之。仍命王友等途中如遇失乃干降。須善撫綏之。不降。卽掩擊之。

勅工部尚書吳中都指揮章安督餽運赴擒胡山

肅州寄居回回哈刺馬牙等叛殺守禦都指揮劉秉謙等據城指揮盧本佯爲承順密約出哨千戶朱迪等內外合攻復其城赤斤千戶塔力尼及沙州衛指揮困卽東各率衆獲散潰卒盡殲之事聞皇太子賜綵幣綿布有差

庚寅車駕循飲馬河次蟠龍軍士乏食命軍中所獲牛羊及光祿寺上供米麪諸物悉給士卒

上勅清遠侯王友等曰士卒從朕遠征備極艱難古人爲將皆與士卒同甘苦士卒未食不先食朕安得獨享辛卯刑科給事中耿通言驍騎等衛倉壞運糧露積虧折工部侍郎陳壽等不預脩宜正其罪皇太子令亟修之

夜月犯昴宿。

壬辰。車駕次定邊鎮。遣都督梁福祭去年陷沒將士。

設萬全東關驛。

癸巳。車駕次雙清源。前丘福陷虜軍士聞。上親征至

是多脫歸。

朝鮮國王李芳遠遣陪臣尹向貢馬及方物。皇太子賜

之鈔幣。

甲午。吏科給事陶瑋有罪下獄。

時瑋啓其鄉一工匠不赴工役而私賈於外。皇太子

曰。爾以是爲忠耶。朝廷置六科。雖以考察奏牘。防閑欺

蔽。亦欲聞政事之闕失。下人之休戚。今朝廷政事。兵民

休戚豈無當言者皆未聞爾言而瑣瑣及此豈汝嘗有私憾乎命刑部名匠訊之刑部還言匠以役滿將暫賈以給路費其家居與瑋鄰素有私忿蓋誣之遂下獄

六月丙申車駕次凝翠岡下令將士臨陣毋掠人口輜重及馬駝牛羊違者斬

庚子車駕次楊青戍戒將士毋妄殺戮

琉球國官生模都古等三人入國子監受學皇太子命賜巾衣靴絲縛帳具

北京監察御史鄒師顏劾御史白春巡視驛傳貪受賄賂宜付法司論罪皇長孫命都察院鞫之

壬寅夜有星大如雞子赤色光燭地出輦道東北行入貫



索內。

甲辰。車駕次飛雲壑前山谷中。阿魯台遣詣軍門請降。上知其詐爲自脫計。遣勅諭令來朝。不決。率兵擊敗之。阿魯台歸順之意。其左右沮之曰。爾不殺大朝使臣邪。大明皇帝何負爾。爾旣背之。今復歸之。縱天地之量能爾容。爾何顏面立於其朝乎。阿魯台默然猶未決。又遣其甥朵兒只來輸誠款。上賜之酒。復遣使與偕往諭之。其下欲降者半。欲戰者半。阿魯台對衆太息曰。今戰勝負未可必。但戰敗欲降可得乎哉。所遣使知虜猶豫無堅志。馳歸奏之。上曰。朕固知此虜詐。諸將請戰。上未可。令諸將暫休。各嚴陣以待。虜亦遲回不敢發。

上以數百騎挑之。虜衆迎戰。右哨先與虜敵。阿魯台率數千騎當中堅。上躬率精騎千餘徑衝虜陣。我軍大呼。人百其勇。矢下如注。阿魯台失色墮馬。虜騎死者相枕藉。阿魯台罵其麾下曰。不從吾言至此。今無及矣。策馬走。我師乘之。追奔百餘里。虜衆潰散。阿魯台以其家屬遠遁。

乙巳。上旋師逐虜潰散者。晚次駐蹕峰。地高少水。忽雷雨大作。軍中足飲。

皇太子免。潁州并太和縣被水災田賦

丙午。上率精騎前進。至長秀川。虜棄輜重牛羊雜畜滿山谷。及河兩傍百餘里。命都督冀中金玉等殿後收其牛

羊雜畜盡焚其輜重。

夜火星犯太微垣右執法。

丁未。上追及虜於回曲津。大敗之。斬其名王以下百數十人。

戊寅。上追虜至廣漠。戍餘虜數十人遙拜祈哀。盡釋之。湖廣都指揮僉事謝奉啓奉命招撫臺虜諸寨蠻賊苗普亮等歸順。皇太子悉宥之。令復業。

設宿遷縣黃河渡口崕山路二關隘。

己酉。車駕發廣漠。伏兵誘虜盡殲之。

上諭諸將曰。虜性至死不易。今雖潰散山谷。必有窺伺。我後者須擒之。乃命諸將先渡河。伏騎士數百餘河曲。

柳林中。令步卒十餘銃士後行。而實草於囊。載之以誘虜。戒之曰。虜至則引入伏中。舉銃伏兵聞銃卽出。上按精兵千餘。最後發。虜見大兵渡河。果貪所載物。競趨而至。旣入伏中。銃發。伏兵躍出。虜亟回走。上所率兵已至。虜窮急。莫知所向。復奔渡河。馬陷入淖泥。遂生擒數十人。餘盡死。至是虜無敢窺於後者。而訊所擒數十人。皆兀良哈部下。嘗入朝授官矣。復叛附阿魯台。上責之曰。爾於朝廷何功。徒因來朝。輒予爵賞。今不思報。乃復叛爲寇。用命悉斬之。

庚戌。車駕次寧武鎮。虜率衆來降者踵至。遣都督王真中官紫塞賁敗阿魯台之績諭。皇太子。

勅英國公張輔成安侯郭亮督餽運赴軍前

辛亥 車駕次紫雲谷諸將皆會賀捷

上曰朕非無深宮廣殿可以自逸而與卿等蒙冒霜露  
暴於遠外者誠以邊民之患不可坐視胡虜之勢不可  
滋長及朕與卿皆未老同力掃除之亦子孫生民之利  
也

膠州知州文敏言民困水災缺食乞累歲逋租折布帛今  
年租輸粟 皇太子從之

壬子 車駕次玉閏山命諸將善視軍士有病者毋令失  
所

甲寅北京監察御史鄒師顏劾啓御史李公敏娶見監罪

囚親屬爲妻。或挾其妻就於家人。通宵不反。致同僚御史  
劉先劉免。張睿郭衡商忠皆娶離異。不明之婦乞黜免。以  
清憲紀。皇長孫令都察院鞠之。

乙卯。車駕發清華源。命諸將巡視。士卒有病者悉舁載  
赴營。

戊午。車駕次淙流峽。遣人督成安侯郭亮餽運赴營。

己未。車駕次錦雲峯。成安侯郭亮餽運至。

庚申。車駕次永寧戍。

辛酉。車駕次長樂鎮。命都督劉江等率師殿後。遇遺骸  
就瘞之。

上聞清遠侯王友等將至禽胡山。與失乃干相距一程。迂

道避往應昌致軍士乏食遣使切責之。

上曰將士從朕遠征勞苦可憫特付爾等先歸就有糧之處休息今舍近趨遠蹈無糧之地致餓死甚衆馬謖違諸葛亮節度舍水上山亮按斬之朕爲天子總六軍乃可廢法耶又嘗諭爾等遇胡寇卽相機勦滅寇距爾一程乃舍之而避去爲將擁兵縱賊尚可逃誅耶

壬戌 車駕次通川甸勅英國公張輔閱視王友所領馬步官軍器仗

癸亥 車駕次全抄苑勅英國公張輔收王友等原受制諭領其衆

命都督馬榮領軍收恤王友所遺之病餒者並給糧食毋

遺棄一人有收病卒一人至營者賞鈔五錠。

湖廣容美宣撫使田勝遣把事杜貴達等貢方物。皇太子賜鈔幣。

乙丑。車駕次威信戍。皇長孫及趙王高燧北京文武衙門遣官進迎鑾表。至行在所。

琉球國中山王思紹遣使臣林佑等及阿端回回哈只火灘等貢方物。皇太子賜鈔幣有差。

七月丙寅朔。早。太廟。命。皇太子行禮。

丁卯。車駕次開平。宴勞將士及進表官。命諸將以所獲牛羊給軍食。

上謂侍臣曰。朕在塞外久素食。非乏肉也。但念士卒艱。



難朕雖食之豈能甘味故寧已之侍臣曰臣等比見  
陛下服御供具儉約蓋將帥有過之者上曰朕往時  
在軍皆然不獨此行但此行尤念士卒勞苦也

命都督張遠等於平胡城運軍餉還開平

遣使勅駙馬都尉西寧侯宋琥鎮甘肅

戊辰遣右庶子楊榮賁書諭皇太子以七月十七日抵

北京代告天地宗廟社稷

皇長孫遣中官進瓜果至行在

改開平李陵驛爲威虜驛

己巳趙王高燧遣使進瓜果行在

勅文武羣臣議王友等罪

辛未。置湖廣施南宣撫司之金峒忠孝東鄉五路安撫司。  
流官吏目各一員。

壬申。車駕次盤谷鎮。勅廣平侯袁容等預撥軍士候隨。  
征將士到家代爲牧放。仍禁軍士踐苗稼採瓜果。

勅寧夏備禦都指揮王叔慎守寧夏。

平胡捷音至京師。皇太子令賞來使及從行銀鈔綵幣。  
賜宴于中軍都督府。

癸酉。車駕次獨石。勅北京留守羣臣毋遠迎妨事。  
脩遼東廣寧右屯衛城池。

改雲南驛爲龍門驛。浩門驛爲雲門驛。

甲戌。車駕次龍門。皇太子遣兵部尚書兼詹事金忠

進迎鑾表。詹事府丞陸中善進袍服皆至。命候入關將士俱易衣服方易之。

上曰。將士同朕勤勞。其衣裘悉敝。未有更易。朕何爲獨先。

乙亥。禮部啓議。凡州縣戶不及五百者。州一年。縣二年。各貢生徒一人。皇太子從之。

湖廣興山知縣秦鳳言。天下都邑民數不同。多者不下萬戶。寡者僅一二百戶。歲貢生員宜有差等。故議之。

交趾按察司僉事劉友年言。交趾衛宜倣雲南例。三分守城七分屯田。皇太子命兵部議行之。

丁丑。皇太子命禮部近聞京師民有厭多男子。生輒棄。

之宜禁止再有犯者并兩隣加罪。

甫兒河衛千戶我不加元者衛千戶別里哥兀當哈等詣  
關自陳願居遼東自在州。皇太子從之。令如例給賜。  
戊寅置交州鎮夷二衛城柵。

裁省福建興化縣丞主簿。

溫州平陽縣風潮漂沒廬舍溺死人民事聞。皇太子遣  
人安撫。

庚辰。車駕次龍虎臺。北京文武羣臣奉迎見畢。卽遣歸。  
山東登州府寧海等州縣自正月至六月男婦疾死六千  
一百餘口。

辛巳。皇太子命戶部賑安慶徽州鎮江鳳陽等郡饑民。

壬午。帝至北京。御奉天殿受朝賀。羣臣上表稱賀。  
癸未。大宴羣臣於奉天殿。未預宴者。各賜之鈔。

甲申。上以皇長孫守北京。民安政理。賜戶部尚書夏  
原吉鈔一千貫。綵幣四表裏。及鞍馬羊酒。

戊子。皇太子千秋節。以仁孝皇后梓官未葬。止勿賀。  
己丑。工部侍郎蔣廷瓚招撫青州府莒州等縣復業民一  
萬三千四百戶。

庚寅。築開平衛及烟墩七座。

辛卯。浙江金鄉衛颶風聚雨。壞城垣公廨。

壬辰。陞指揮同知滿都爲陝西指揮同知。撫綏涼州韃軍。  
夜有星大如盞。青白色有光。出北落師門西南行至近濁。

甲午論從征將士功行陞賞。

八月乙未左庶子楊榮由南京至北京復命撰平胡頌以進。

丙申夜有星大如盞青白色尾跡有光出西方西南行入游氣。

丁酉遣官釋奠先師孔子。

監察御史李琳言福建各塩場累歲虧折課乞論官吏罪上知煎辦之難遣人馳驛宥之。

戊戌皇太子代祭大社大稷。

木邦宣慰使罕兵法遣頭目貢象馬金銀器物等項謝賜賚恩。

改槍杆嶺巡檢司爲長安嶺巡檢司。

置北京牧馬千戶所吏目一員。

壬寅以安遠伯柳昇北征有功。進封侯爵。

癸卯。皇太子命如例賜國子監琉球四川雲南生楊麟等九十二人衣服。余緝巾。絛靴襪。

賑陝西伏羌通渭等縣饑民五千八百九十餘戶。

大理寺左寺丞遠志有罪。謫北京苑馬寺充軍。

乙巳。浙江按察司僉事徐善安有罪。謫戍邊。

丙午。遣官祭歷代帝王廟。

丁未。皇太子代祭風雲雷雨嶽鎮海瀆山川等神。遣官

祭旗纛。

以都指揮同知王貴李文北征有功俱陞爲陝西都指揮使

命行在禮部集僧道於慶壽寺白雲觀建齋醮三晝夜資薦北征亡故軍士

庚戌命禮部厚賜北征亡故官軍之家襲職優給如例

癸丑修揚州府寶應縣塘岸八十里

寧遠侯何福懼罪自殺命追削封爵

丙申河南衛軍人蔡挽兒妻產三男事聞命禮部循例優給

丁巳以朝鮮國王李芳遠獻馬萬疋助北征遣中官田嘉禾海壽賁勅并白金千兩紗羅千疋綵絹五百疋賜之



置交趾鎮夷衛經歷司經歷一員。

戊午命北京行部運塩三萬斤儲懷來以給開平守禦將士。

己未賜扈從北征文職官鈔幣有差時命學士胡廣庶子楊榮諭德金幼孜賜同尚書。

設四川長河西魚通寧遠等處及苦白沙思遠等寺五僧綱司。

河南按察司僉事張翥等言黃河泛漲壞開封舊城民被患者萬四千一百餘戶沒田七千五百餘頃命戶部遣人巡視安撫。

辛酉旦老人星見丙位色赤黃。

壬戌以沙河衛指揮使卽來等赤斤蒙古千戶答力尼等不從哈刺馬牙等叛獲賊有功各通陞一級賜綵幣衣服長沙妖賊反豐城侯李彬討平之

甲子水星犯右執法

九月乙丑朔改立北京灤州蠶沙河泊所

丁卯古路慶之地女直頭目不理哈等來朝乞于東寧居住從之授千百戶之職賜予如例

戊辰夜有星大如盞青白色光燭地出正南雲中西南行至近濁

己巳車駕幸天壽山議武義伯王通天氣嚮寒善撫恤工匠軍民人賜鈔有差

辛未雲南霑益州土官知州阿周遣其屬貢馬。賜鈔幣。

壬申設四川長河西刺思綱道紀司。

癸酉重陽節賜羣臣宴。

占城國王占巴的刺史濟標等貢象并金銀器等物。遣

中官馬彬送還賚勅賜其王錦紗羅。

甲戌修高郵衛城池。

乙亥夜木星犯靈臺土官。

丙子朝鮮國王李芳遠遣陪臣趙大林等奉表賀平胡獻

馬及方物。賜鈔幣有差。

丁丑以金吾衛左衛指揮使李福等征胡有功各陞一級

夜月犯中屏西第二星。

已卯。以擒獲交趾賊首簡定功。陞交趾軍士漆永受爲千戶。賜冠帶。并銀五十兩。鈔三百錠。綵幣三表裏。餘陞賞有差。

中官張謙行人周航使浣泥國還。其王遐旺遣其叔蔓的里哈盧等百六十人偕來。貢方物謝恩。賜文綺襲衣鈔幣有差。

庚申。命番僧綿思吉等爲淨慈妙濟等國師。各給護勅。俾自在修行。

辛巳。命戶部遼東備禦官軍俸糧給全米。

甲申。魯王輦輝奏護衛給月糧已三年。當罷。乞以六分屯田四分守城從之。

福建右布政張拱言福建官軍俸糧倉儲有餘。有司復令民海運舊者不免腐爛。新者無倉收受。乞將今年秋糧折收布鈔從之。

乙酉。老撾宣慰使刁線反。遣頭目貢馬及方物。賜之鈔幣。

撫安山東給事中王鐸言。長山等縣文廟聖賢塑像衣服左袒。乞改正。從之。

乙丑。諭皇太子以十月初四日啓行回京。命預告天地太廟社稷。

夜。月犯太微西垣上將星。

設北京順天府廣備庫。置大使副使。准內庫例。周歲考滿。

辛卯。烏撒軍民前土官知府阿能遣人貢馬。賜之鈔幣。  
遣內官關僧齎書及銀幣往西土。徵尚師昆澤恩巴。  
夜。金星犯天江南二星。

十月甲午朔。皇太子代享太廟。

乞忽古里三衛女直野人頭目阿兒禿等九十二人來朝。  
命爲指揮千百戶等官。賜冠帶襲衣鈔幣。

命番僧班丹藏卜等爲淨覺弘濟等國師。把奔等爲禪師。  
各給誥印。

夜。星有大如碗。赤色有尾跡。光燭地。出司怪旁。東北行入  
輿。鬼星。

乙未。行在都察院右副都御史李慶言。公侯都督令家人

子弟行商中鹽凌轢官吏倍數多支乞付於法。上令戶部楊諭禁止。

女直野人頭目撒加因等來朝。命爲兀里奚山衛指揮等官。居安樂州。賜予如例。

丁酉。車駕發北京。

右中允劉子春劾啓左都御史陳瑛等方命廢事乞懲以罪。皇太子責瑛等刻薄其速改之。

戊戌降刑部左侍郎劉季篈爲兩淮運司副使。應天府尹向寶爲兩浙運司判官。

己亥。駐蹕新城。命會州衛指揮趙得率保定涿鹿茂山蔚州衛軍共千人守紫荆關。

甘肅總兵官西寧廣朱琥奏調都指揮丁綱鎮涼州。王貴鎮肅州。史昭與趙從之。

庚子。浙江臨海縣言。淫雨淹沒田稼。民多饑窘。乞以鈔代輸稅糧魚課。皇太子從之。

交趾布政司言。新例徒流遷徙杖罪。皆北京種田。比先降刑名事例不同。皇太子以交趾在萬里外。宜從先例。令刑部移文知之。

癸卯。務本之訓成。

時上以長孫生長深宮。欲其知稼穡之艱難。因巡幸北京。以待行使。歷觀民情風俗。及田野農桑勤勞之事。而知國用所需。皆出於此。爲民上者。宜加憫恤。且舉



太祖高皇帝創業之難。及往古聖賢之君。昏亂之主。興亡得失。可爲鑒戒者。以致飭勵之意。書成名務本之訓云。

乙巳。改北京遷安驛。隸灤州。

戊申。戶部言蘇州府崑山縣青州府日照縣各貸預備倉糧。拯饑民。以累歲水災不能償。乞折輸鈔。皇太子從之。書。太白見未位。

壬子。夜。月犯五諸侯二星。

甲寅。車駕次濟寧。魯王肇輝來朝。賜絲幣等物。

夜。有星大如彈丸。赤色。尾跡有光。出天關。流五丈餘。光如雞子大。西南行入天桴。

乙卯。上聞周王櫛於國中作殿奉祀。太祖賜書戒止之。

書曰。禮支子不祭。皇祖國廟則肇於始封之王。若太祖高皇帝之祀。朝廷自有宗廟。王今祀於國中。過矣。孔子曰。祭之以禮。若不得爲而爲之。不可爲孝。王其審禮而行。勿貽異議。

丁巳。車駕次臨城。侍行賢妃權氏以疾薨。賜祭。謚恭獻。權瘞於澤縣。

戶部言。江西廣昌縣民疫死八百餘戶。乞蠲其稅。皇太子從之。

戊午。夜。月犯太微垣。右執法諭三法司宜加敬謹。無罪。

不可枉有罪不可縱須得中道無纖毫輕重。

十一月癸亥朔戶部會議直隸郡縣官租既重又令遠輸誠爲勞費宜令輸納附近官倉。皇太子從之。

乙丑命武安侯鄭亨率領北京各衛所軍馬往宣府操備。己巳韃官脫罕等十人率男女百六十口來歸。奏願居京師。賜予如例。

癸酉巡按福建監察御史李素劾啓倭寇攻破大金定海二千戶所羅源等縣殺傷民軍乘勢攻圍平海衛百戶繆真戰死。福建都指揮童俊及千戶王朝用等逗遛不救援宜正典刑。皇太子命法司鞫之。

甲戌帝還京遣官祭告天地宗廟社稷孝陵承

天門及京都祀典旗纛諸神

上御奉天殿受賀大宴文武羣臣

丁丑思南宣慰使王宗鼎遣副長官李斌貢馬賜鈔幣  
庚辰冬至上御奉天殿受朝賀大宴文武羣臣四夷朝  
使

辛巳虎賁左衛千戶楊瑋發指揮曹昇私蓄妖書命陞  
府軍衛指揮僉事

壬午命張宇清爲正一真人

千戶卜玉發都督梁銘隨侍皇太子監禮擅用有過衛  
士帶刀入直詔銘下獄

忠順王脫脫沉湎於酒凌辱朝使遣指揮毋撒等戒諭

之

乞烈速頭目干塔奴等來朝。命爲指揮僉事。賜誥印冠帶襲衣及鈔幣有差。

緬甸宣慰使那羅塔遣頭目忙只等貢馬。賜幣有差。癸未。賜國子監琉球等處生李傑并從人冬衣靴襪。

禮部尚書呂震曰。昔唐太宗興學校。新羅百濟皆遣子入學。當時僅聞給廩膳。未若今日賚與周備也。陛下盛德前古未有。上曰。遠方慕中國禮義。故遣子入學。必足於衣食。然後樂學。我太祖高皇帝命資給之。著於令典。所謂曲成萬物而不遺者。朕安得違之。

甲申。置四川施州衛鎮南長官司吏目一員。

戊子。給江淮濟川二衛水夫胖襖。

己丑。陝西指揮同知劉昭奏以茶易河州衛各番馬七千七百一十四匹。發陝西甘肅二處苑馬寺孳牧外。餘馬六千二百八十匹。乞送北京太僕寺飼養。從之。

每匹上馬茶六十斤。中馬茶四十斤。下馬遞減。

壬辰。以羽林千戶卜玉發都督梁銘罪。陞指揮同知。賜鈔三千貫。及襲衣鞍馬。

遣指揮哈剌那海等有涼州韃官虎保亦令真巴等罪。率妻子萬二千餘口來歸。悉令復業。

十二月。癸巳朔。欽天監進永樂九年大統曆。上御奉天殿。受之。頒賜諸王及文武羣臣。

上視牲南郊。

韃靼太師阿魯台遣平章脫忽歹等來歸貢馬。命宴勞之。賜襲衣鈔幣。

甲午。瓊州府文昌縣斬脚寨黎首振凋生等來朝貢。賜以鈔幣。俾往招諸洞生黎。

乙未。楚王楨寧王世子磐斌來朝。宴楚王於華蓋殿。賜世子宴於前三公府。其從官皆賜宴。

戊戌。諭勉楚王隨行文武官屬。賜文綺及鈔有差。

諭曰。朕卽位以來。楚王未嘗有越禮踰分之事。雖府中有一二小人作過。悉是其下所爲。王無預焉。王素性樂善。秉德奉法。可爲賢王。爾等爲其官屬。與有榮矣。然爾

等亦有贊輔之力。今歸更加勉之。

楚王楨言王府校尉死亡者。自今請畱所生另補缺。庶免別僉從之。

河南守臣言河決壞城。宜及時修理。諭工部遣人往視隄防。

爪哇國王都馬板遣使亞烈速木等上表貢馬及方物。宴賚其使以文綺賜之。

暹羅國王昭祿群英哆羅諦遣使曾受賢等貢馬及方物。并送中國流移人還。宴賚其使。遣中官張原等賫勅并織金文綺紗羅勞之。

設交趾長江安樂磨那杜四巡檢。



庚子臘日賜文武羣臣宴。

遣行人余昺賁勅往涼州賜都督吳允誠妻綵幣等物。

諭曰比韃寇以兵脅爾爲叛爾夫及子從朕征討而爾能守節勵志與子管者謀執叛者戮之而秉丈夫之節忠以報國智以脫患朕甚嘉焉今賜爾綵幣十表裏米百石鈔四千貫羊百羖用示褒嘉陞子管者爲指揮僉事其所部都指揮保住等各賜綵幣八表裏米八十石壬寅重建醉仙樓。

樓在三山門外洪武中建比燬於火故復建之。

戶部尚書夏原吉言揚州府如臯縣水沒民田四十五頃宜蠲其租從之。

癸卯。蘇州府吳江縣言石塘官路連年土石坍塌。橋梁斷壞。請及時修理。勅通政趙居住督理之。

甲辰。周王橚來朝。隨從軍士在途擾民。往往空室逃避。命錦衣衛執軍士送王自治。

福建邵武府言境內疫死民一萬二千餘戶。所遺田地。乞以杖罪囚徒耕種。輸稅從之。

乙巳。孔子五十九代孫彥縉來朝。賜宴于奉天殿。

丙午。兀列河等處女直野人頭目早花等二十人來朝。

仰爲指揮千百戶。賜誥印冠帶襲衣及鈔幣有差。

丁未。勅諭韃靼太師阿魯台。

爾遣脫忽歹等言元氏子孫已絕。欲率部屬來歸。爾此

心朕具悉之朕奉天命爲天下君惟欲萬方之人咸得其所凡有來朝者皆厚撫之初無遠近彼此之間脫忽互又致爾言謂瓦刺之人非有誠心歸朕彼如誠心歸附當遂獻傳國之寶矣彼誠否固不可必而朕未嘗重此寶也自昔堯舜禹湯文武數聖人主天下豈有此寶也蓋帝王之寶在德不在此如必以此爲寶則元氏子孫當永保天位福及子孫何至衰敗凋落如今哉脫忽互等回遣指揮岳山鎮撫丁全等偕行諭朕之意并賜爾綵幣至可領也

戊申蘇門答刺國王罕如里阿必丁榜葛刺國王靉牙思丁遣使麻抹細智等貢方物賜賚有差

己酉命都督魯真猷都指揮胡宗陳懷率陝西都司馬步軍  
五千河南都司三千山西都司二千在甘肅操備者聽總  
兵官駙馬都尉西寧侯宋琥節制

庚戌刑科給事中周智有罪謫戍交趾

辛亥命孔彥縉襲封衍聖公

壬子都察院左都御史陳瑛劾隆平侯張信強占丹陽練  
湖及江陰官田七十餘頃法當逮問命三法司雜治之  
戊戌犯木星

癸丑諭吏部尚書蹇義繼今風憲更不得用吏著爲令

上曰御史國之司直必有學識達治體廉正不阿乃可  
任之刀筆吏知利不知義知刻薄不知大體用此徒任

風紀祇使人輕視朝廷前之由吏爲御史者悉罷之  
改置永寧南邊界首烏撒七星關巡檢司

甲寅勅甘肅總兵西寧侯宋琥謹守常法不宜輕易遣人  
出境

上曰禮臣子無外交昔中山王守北京十餘年未嘗輕  
遣一人出塞外當時邊圉無事中山亦安享富貴今名  
無窮爾能遵朕訓則邊境可安爾之富貴亦永遠矣

吏部言鹽運司判官考覈事例職掌未載請依本司堂上  
官例北京新設苑馬寺卿丞等官考如行太僕寺官例從  
之

都指揮同知吳玉奉命往胡廣調軍縱軍虐民謫戍邊自

效。

乙卯撒馬兒罕并大州等處回回火者馬兒等獻玉璞硃砂。賜鈔衣服有差。

罷北京城內外城門郎。

丙辰定祠祭署。改郊壇爲天地壇。鍾山爲孝陵。

朝鮮國王李芳遠遣陪臣林整琉。琉國中山王思紹遣姪三吾王良。暨各貢方物。賀明年正旦。命禮部宴勞之。

戊午勅寧夏守備都指揮王倂聞虜欲寇近邊。須嚴備之。慎勿輕戰。墮其譎計。

交趾賊首陳季擴遣胡彥臣等上表請降。上以能遷善許之。命爲交趾布政司使。

已未徐州碭山縣言連年水災薄收乞租稅折鈔從之

辛酉享太廟

是歲天下戶九百六十萬五千七百五十五口五千一百七十九萬五千二百五十五賦稅糧三千六十二萬二千一百三十八石餽運北京糧二百一萬五千一百六十五石有奇交趾上供金百三十二兩

辛卯永樂九年正月壬戌朔

上御奉天殿受朝賀大宴文武羣臣及四夷朝使

甲子命兵部尚書方賓等榜諭天下愚民遵守朝廷法度毋嘯聚爲非

諭曰建文時賦役繁重兩廣江西福建多有嘯聚作亂

爲害鄉里。朕初卽位。不忍捕戮。遣官招諭。悉能聽從。各還生業。今天下平寧。朝廷紀綱法度已定。尚慮愚昧者。不知爲善之樂。或因有司暴虐。或爲豪富凌逼。乘其小忿。輒入山林。嘯聚劫掠。於法必應勦捕。然兵戈所加。傷其善人。此徒豈無良心。當預先開導。爾兵部卽榜諭。自今務須遵守法度。賦役一體應當。以盡爲民之分。如有分外科徵。自下而上。陳告若不准理。許賫大誥。赴京陳訴。如鄉里有頑惡無賴之人。扇誘作耗。其良善者能擒之解官。朝廷量加賞賜。豈不勝於脅從受禍。果能遵守朕訓。永遠安吉。違則有禍。悔將無及。

丙寅立春。

上御奉天殿。文武羣臣行賀禮。賜宴。



贈太常寺寺丞袁廷玉爲本寺少卿。

廷玉鄞縣人。少遊海上。遇異人授相術。論人壽夭窮通。休咎皆有驗。上在潛邸。聞其名。召之。一見再拜稽首。曰。殿下太平天子也。龍質鳳姿。天高地廣。日月大明。年踰四十。萬方仰照焉。上旣正大統。追憶廷玉言。遣內侍召至。以爲太常寺丞。賜賚甚厚。暨巡狩北京。復召至。行在。懇以老乞歸田里。至是卒。賜祭贈官。

丁卯。享太廟。

開平備禦成安侯郭亮等奏請給金鼓。夜巡銅牌。起馬符驗。命所司悉給之。

己巳。修江西安福縣龍陂等處塘堰。

庚午。浙江麗水縣請修築通濟堰。從之。

賜暹羅國使臣曾壽賢。四川長河西刺麻長巴監藏。東洋使人李宥等宴。

辛未。以大祭南郊。上御奉天殿。文武受戒。

錦衣衛百戶馬貴使西洋古里等處有勞。陞爲本衛指揮同知。

壬申。老嫗宣慰使刁線反。遣人貢方物。賜賚其使。遣中官楊林以文綺往酬之。

甲戌。大祀天地于南郊。上還御奉天殿。文武羣臣行慶成禮。

乙亥。以郊祀成大宴。文武羣臣及四夷朝使。

丙子元宵節賜文武羣臣宴。

丁丑命安遠侯柳升鎮守寧夏。

己卯命英國公張輔爲征虜副將軍。會征夷將軍黔國公沐晟率兵討交趾叛寇。

勅交趾都布按三司凡有犯重罪而情可矜者發英國公處立功贖罪。

庚辰勅甘肅總兵官西寧侯宋琥得報韃靼失捏於剽掠黃河東岸宜戒都指揮王倬輕敵陷身不可怠忽。

辛巳順天府香河等縣奏所收官草因雨浥爛而法司坐侵欺責償甚急乞寬恤。特命釋之仍賜鈔五錠爲道里費。

壬午吏部言交趾新附。免各官明年朝覲。止命布按二司掌印官一員來朝從之。

命吏部凡官邊方當朝者皆止勿來。

巡按陝西監察御史劉璧言潼關等衛補造軍器料買銅鐵丹漆牛觔魚鱉生漆黃麻皆非土產。請令所司係本土所產者先辦其餘官給價銀於出產處收買爲便。從之。

甲申命戶部於復征交趾將士全支俸糧。修湖廣襄陽衛護城堤及樊城西堤。

浙江上虞縣請改置通明埧於鄭鑑山爲便。從之。

乙酉建孝陵門如大祀壇南門之制。

右庶子楊榮奏乞奔母喪。命中官宋成馳驛送歸。且勅

榮速來。

丙戌命豐城侯李彬平江伯陳瑄等率領浙江福建官軍  
勦捕海寇。

命都督費義率舟師命衛輝府所儲粟二十二萬四千四  
百石赴北京。

揚州府奏高郵州鹽城北家溝塘岸三十里及張家溝等  
處塘岸因水衝決乞發丁夫修治。皇太子令工部覈實  
修築。

戊子中軍都督同知蔡福坐私賣官馬謫戍邊自效。

己丑免北京祁州被水災田租。

刑科給事中耿通等劾輪班匠役滿工部仍畱不遣請罪

之。命錦衣衛執郎中以下鞠問。尚書宋禮令戴罪理事。  
二月壬辰朔。遣勅戒勵秦王尚炳。符至不出迎。侮慢使者。  
械長史紀善典儀送京師。王自今勉力學問。庶幾寡過。  
癸巳。北京國子監言生徒增益。請如南京國子監例。置博  
士助教。學正。學錄。掌饌官員從之。

戶部言四川涪州武陵縣石床灘有龍泉塩井。近河。夏秋  
爲水所沒。春冬煎塩可二十七萬二千二百五十斤。宜以  
屬郁山井塩課司提督開煎從之。

賜光祿寺卿權求均少卿鄭允厚陪琉球國王姪三吾王  
良璽等宴。

遣中官張謙等賫勅浚泥國。賜王遐旺錦綺羅絲絹百二

十疋并賜其頭目有差。

琉球國中山王思紹遣王相之子懷德寨官子祖魯右入國子監受學。

江西吉水縣知縣錢本中卒。民哀慕之。留葬吉水。爭趨負土營墳。

本中常州武進人。涉獵書史。明法律。洪武中以才舉。授河間故城縣知縣。改元城。再改吉水。前令不職。豪民宿吏並緣爲奸。良苦之。本中至。捕其尤者一二。徙遠方。邑中肅然。新解宇壇壝學舍。躬視諸生。旌別勤惰。以勸政務。清簡。不任刑罰。邑嘗有盜聚山谷間。初劫掠。郡守欲以兵勦之。本中單騎詣賊壘。喻禍福。衆信服。卽縛首賊。

送官。會赦皆得免。本中操守清堅。門無私謁。妻子僅足衣服。後坐累罷官。翰林學士胡廣薦其治得民心。遂復吉水知縣。縣民聞本中復來。奔走迎拜。未幾以疾卒。

丁酉遣官釋奠先師孔子。

戊戌祭大社大稷。

遣官祭先農。

己亥山東沂州言沐河口衝水決五十餘丈。請發民夫修築從之。

壬寅置湖廣容美宣撫司之水盡源通塔坪石梁洞三長官司。流官吏目各一員。

修江西安仁縣饒家陂。



癸卯。上諭侍臣謹小事。改小過。

上御右順門覽奏牘。時御案鎮紙金獅欲側將墜。給事中耿通趨進移置案中。上顧侍臣曰。一器之微。置於危處則危。置於安處則安。天下大器也。獨可置之於危乎。尤須安之。天下雖安。不可忘危。故小事必謹。小不謹而積之。將至大患。小過必改。小不改而積之。將至大壞。皆致危之道也。先是。上諭六科查奏牘。恐發落有失。中者悉改之。有奏改之。恐失信於下。上曰。但欲得當。何憚於改。至是。因此申諭之。

修天地山川孝陵及奉天殿祭器。

勅交趾總兵官英國公張輔。黔國公沐晟等。陳季擴果能

至誠歸順。卽赦其罪。若懷詐不誠。務在協謀平賊。庶不負朕委任。

甲辰都督罕提吉兒女直野人頭目馬吉你等來朝。授馬吉你爲指揮。餘爲千百戶鎮撫。賜詔印冠帶。及鈔幣有差。上諭學士胡廣等曰。朕非欲併其土地。蓋以此輩貪殘。自昔數爲邊患。勞動中國。宋歲賂金幣。剝及下人膏血。卒爲大患。今旣畏服來朝。則恩遇之。從所欲。授一官。量給鈔賜資。損小費以弭重患。亦不得不然。

瓦剌順寧王馬哈木等遣使馬哈麻等貢方物。并言本雅失里阿魯台爲害邊境。願早圖之。命禮部宴其使者。賜之絲幣。

夜有星大如盞赤色有光出陣車流丈餘發光近西濁北行至游氣。

戊申都督柴別里哥等百人來朝貢馬。賜鈔幣有差。已酉河南武涉縣言去歲天雨浸淫沁河南北流潰九百餘步。渰田土廬舍請丁夫修築從之。

庚戌山東齊東知縣張升言去歲洪水衝決小清河渰沒下涸官堤等處塩場及青州屬縣邑田請浚上流修隄防使水由故道。皇太子命工部速遣官相度修浚。

浚山東難縣千舟等河及築壽光縣隄以禦水患。都察院左都御史陳瑛有罪下獄。

瑛初有寵恣意羅織逢迎凡建文諸臣得罪深重瑛寔

贊之既而給事中耿通劾其誣陷李貞中允劉子春劾其方命廢事。皇太子皆宥之。至是上聞遂下獄。死籍其家。

甲寅秦王尚炳來朝。且首服不親出迎。勅符之罪。上宥而勉之。

遣使嘉日本國王源義順獲倭寇。賜金織文綺百疋。鈔五千緡。

浚山東福山縣城西官渠千四百餘丈。

丙辰詔諭交趾自永樂九年二月以前但有嘯聚山林者咸赦其罪。稅糧及金銀等項停徵三年。見任土官有才能顯著善撫軍民者。奏聞以憑旌賞。

丁巳改禮部右侍郎王彰於戶部。

廣東都指揮司奏倭賊攻陷昌化千戶所殺死千戶王偉等副總兵指揮李珪等不救援追勦罪當死。命捕寇贖罪如寇不獲皆斬。

己未開會通河。

自濟寧至臨清舊通舟楫。洪武中沙岸衝決河道淤塞。故於陸路置八遞運所。每所用民丁三千車二百餘輛。歲久民困其役。永樂初屢有言開河便者。上重民力未許。至是濟寧州同知潘叔正言會通河道四百五十餘里其淤塞者三之一。浚而通之。非惟山東之民免轉輸之勞。實國家無窮之利。乃命工部尚書宋禮都督周長往視禮等還。

極陳䟽浚之便。且言天氣和霽。宜及時用工。於是遣侍郎金純發山東及直隸徐州民丁。繼發應天鎮江等府民丁。併力開浚。民丁皆給糧賞。而蠲其他役。及今年田租。命尚書宋禮總督之。遣吏部侍郎師達以大牢祭山川。城隍之神。仍命御史二員監督。

夜有星大如碗。青白色。出正西雲中。西北行入雲中。

設奴兒干都司。

置開原馬市。

三月辛酉朔。

廷策會試中式舉人陳璣八十四人。賜蕭時中苗衷黃賜等進士及第。楊慈等三十二人。進士出身。陳祚等四十九

人同進士出身。

七年己丑會試取陳璉等八十四人。值上巡狩北京。詔禮部以璉等寄監讀書。八年冬。車駕還京。至是廷試。

癸亥。詹事府丞陸中善坐不能輔導。降交趾。丘溫知縣。工部言湖廣安陸州及京山景陵等縣圩岸爲水所決。宜修築從之。

甲子。賜進士蕭時中冠服銀幣。餘並賜鈔五錠。宴於會同館。

諭三法司審錄囚徒。當明君子小人之分。

上曰。刑當矜恤。然論刑之際。尤當明其君子小人。若君

子有過如失足溝澗。偶出於誤。當矜其情而護之。小人  
有罪如嗜貪飲食。恣意爲之。非過誤也。當懲以法。君子  
誤犯而不恕。非右善之道。小人故犯而不懲。有縱惡之  
失。爾等其審邪正。精權度。不宜槩論。

戊辰遣都指揮張鬼力赤梁北斗奴賜祭忠順王脫脫勅  
都指揮哈刺哈納爲都督僉事鎮守哈密。

修揚州泰州河堤岸一萬八千六百餘丈。

命工部建進士題名碑於國子監。

建州衛千戶古那等及禾屯吉衛指揮伯顏帖木兒等奏  
願居遼東安樂州從之。賜資如例。

大營都指揮僉事牛諒坐奏對不實免官。責隨寧夏總兵



官安遠侯柳升立功自効。

癸酉械隱情首賂貨指揮詣交趾充軍

先是通政司言指揮首天城衛千戶犯罪繫刑部獄其母致貨託已爲賂部官求免已不敢從併以其貨來首上問千戶與指揮有舊乎對曰無上曰非故舊而輒以違法干之獨不慮事敗哉此非人情命法司訊之至是法司奏指揮所居近刑部而千戶之母寓其鄰家朝夕饋子食指揮察其有賈橐紿言已與刑官厚可以賂免母遂致貨傍有欲發其姦者指揮懼遂自首而隱其實情論法千戶母當準與駐律指揮當罷職謫屯種上曰愛其子以賂其免人之常情且婦烏知法律其宥

之指揮始則欺人取貨終則隱情罔上又汗鹺朝臣此不可恕但罷職屯種何以示懲卽械送交趾充軍。

鎮康州土官知州曩光遣頭目刁怕楞等來朝乞貸刼去之罪遣給事周讓行人方濬往戒諭之。

建州失里綿二衛女直野人因童撒歹也輕哥等二十人來朝命爲指揮等官賜予有差。

甲戌選進士楊慈劉永清錢習禮陳燧黃壽生陳用俱爲翰林庶吉士。

時鍾英張習張式馬信邵聰皆由監生選入翰林讀書至是中進士改庶吉士餘分隸庶司觀政。

雲南潞江長官司長官曩璧遣子惟羅法等貢馬賜綵

幣

乙亥陞交趾宣化府土官同知黃公剔爲大原知府。命吏部移文交趾布政司給路費廩給遣其家屬來完聚。

丙子有縣官坐贓罪謫戍邊以年踰七十擊登聞鼓乞哀矜當改過自効。命屈法宥之令還鄉爲民。

丁丑中軍都督劉江守遼東不謹斥俟致賊入寨殺官軍土怒遣人斬江首既而宥之使圖後効。

給事中張昭鄭傑周岐俊坐事俱謫交趾充吏。

己卯民有盜勸善書者刑部黥發戍邊奏聞。命免戍邊去所黥字。自今凡情可矜疑者必先具奏。

上曰朕常命爾等罪當黥者具所犯來白若可矜憫者

免之。蓋黥卽爲棄人。欲改過無由矣。盜勸善書原其心在好善。但取之不以道。爾其可比盜財者。桀黥之乎。

修福建長樂縣官塘圩岸。

庚辰溫州府民言本府歲白礬數千斤赴京。阻隔山路。乞附載運糧舟輪京爲便。命罷其歲征。布衣不必染色。上問工部臣曰礬欲何用。對曰以染色布。上曰特染布耳。而勞民數千里之外。可罷之。

壬午浚河南中潞河故道。

河水屢歲爲患。遣工部侍郎張信往視。信訪得祥符縣魚王口至中潞下二十餘里有舊黃河岸。與今河面平。浚而通之。俾循故道。則水勢可殺。遂繪圖以進。詔發河

南民十萬命興安伯徐言土部侍郎蔣廷瓚率運木夫同侍郎金純相度開浚丁夫給糧賞且蠲戶內今年租稅仍遣定國公徐景昌以大牢祠河神戶部侍郎古朴以大牢祭河南境內山川時工部尚書宋禮督工開會通河遂命禮兼董之。

六科給事中曹閏等劾五軍都督府掌府事成國公朱勇魏國公徐欽定國公徐昌吉永康侯徐忠右都督郭義監試襲職武官縱家僮奪其弓槊法司奉旨追捕勇等蔽不與請正其罪。上命錦衣衛悉捕其僕付法司勇等姑宥其罪。

甲申遣人賞勅勞交趾土官叅政莫邃等勦戮敗寇固守

境土賜絲幣有差。

乙酉鎮守大同江陰侯吳高請畱屯種軍之半操練以備不虞。命兵部宜視地險夷以定守備多寡。且耕且守以爲定制。

陽和畱十之四。天城朔州畱十之三。蔚州畱十之二。廣西鎮安土官知府岑永壽遣岑榮堅貢馬謝襲職恩。賜之絲幣。

工部右侍郎任毅坐事降管繕司主事。

浙江都指揮同知張貴坐縱酒廢事戍邊。

陝西都指揮高英坐誣罔免。

丙戌命平江伯陳瑄都督宣信帥舟師海運糧儲赴北京。

丁亥遣中官勞都督吳允誠屢征有功其妻在涼州不爲賊誘賜鈔二千錠綵幣二十表裏米百石羊三控仍令所司宴之。

戊子命中軍右都督劉江仍鎮守遼東復都指揮同知蔡斌官備禦遼東廣寧。

湖廣武陵民劉觀音保妻王氏一產三子事聞。詔循例優給。

庚寅修蘇州至嘉興石土橋七十餘里泄水洞三十一處刑科給事中任憲以罪謫戍邊。

四月辛卯朔享太廟。

癸巳復給事中任守禮官。

刑部都察院言各處布按二司所鞠重罪。審覆明白者。請遣官臨決。命再遣人審覆來聞而後遣官決之。

上曰。雖云審覆明白。然能保其中悉無冤乎。京獄有冤者。得擊登聞鼓自陳。彼在數千里外。或有冤欲自陳難矣。人命既絕。不可續寧緩無急。果如有失。緩可以改。急則欲改無及矣。

琉球中山王恩紹遣使坤宜堪彌等貢馬及方物。并以長史程復來請命致仕還饒州。命陞復爲琉球國相兼右長史。仍賜坤宜堪彌等鈔幣遣還。

乙未宥兩淮鹽運司副使劉季篈罪。命服士服。隸翰林院修書。



免淮安府安東縣永樂七年牛租。

己亥修湖廣寧遠左右千戶所城池。

庚子朝鮮爪哇諸國各遣使及四川湖廣廣西土官宣慰使楊昇等來朝貢馬及方物賀萬壽聖節賜賚有差。夜月犯木星。

壬寅守聚寶門千戶奏檢入城民行李得金鐲及銀數錠於法不應。命悉還之。

上問刑部尚書劉觀此在何法。對曰。法不得以銀交易。百姓不得用金首飾。上曰。禁民交易服用。何嘗禁其藏蓄。命悉還之。顧千戶諭之曰。爾職在察詰奸細。民違法何預爾事。今姑宥爾。如再越職厲民。必罪不宥。

命戶部開河。自効民丁。一體給糧。免租稅。

初朝議開會通河。及浚河南。黃河。命戶部凡民丁皆給米鈔。及蠲戶內是年租稅。而山東河南之人。多有自願効力者。上聞之。遂有是命。

丁未。萬壽聖節。上御奉天殿。受朝賀。宴文武羣臣。及四夷朝使。

己酉。召遼谷。潘安。唐郢。伊肅。晉九王來朝。以次而至。

時周王已朝。蜀慶二王有疾。未召。

庚戌夜。有星大如盞。赤色。有尾光。燭地。出紫微垣內。四輔旁。北行至游氣。

辛亥。都察院僉都御史史仲成。効陝西按察使辛耀副使。

徐道正張太僉事江榮馬驤賞顧挾妓飲酒有玷風憲  
上命都察院械置耀等於陝西按察司前榜示警衆。

甲寅交趾右叅政劉本言三事。上嘉納之。

一言交趾新附。未知朝廷禮教。冀寬以撫之。將一切不  
急之務。悉皆停止。仍降恩旨。撫安人心。庶蠻民絕從賊  
之念。一言今後宜選老成廉謹之士。除郡邑。庶撫綏有  
道。夷民得安。三言乞選老成有學者典教。俾其子弟習  
知中國禮義之化。變易夷俗。他日亦可得人資國用。  
丙辰賑山西保德等州縣饑民二萬二千六百八十口。給  
糧一萬八百石。

丁巳交趾總兵張輔至南寧。奏反賊陳季擴阮師等無悛。

心請進兵討之。

庚申勅鎮守大同江陰侯吳高近得謀報虜寇失捏干謀襲大同宜思患預防萬千無失。

五月乙丑端午節賜文武羣臣宴。

丁卯設交趾鹽課提舉司通濟鹽倉。

四川天全六番招討普安撫司及白納泥溪諸長官司湖廣施南忠洞二安撫司各遣人貢馬悉賜鈔幣。

己巳定交趾土官考覈例。

凡土官或遷調任或本土世襲俱以三年爲一考開任之事跡行本衙門驗實申布政司按察司考覈平常者復職稱職者於官錢內量加賞賜復職闕茸不稱者降

一級于缺官衙門補用六年再考如初考九年給由赴京通黜陟若貪污害民劫奪讐殺事有顯跡者按察司舉問如律

工部右侍郎劉仲廉言遼東三萬衛成造軍器乏缺宜依定遼左衛例設鐵場撥畸零軍一百一十二名以其半炒鐵備用半屯田以給從之

庚午進士王彥自陳臣家安福與奸惡外姻有連臣雖中進士實罪人應就繫上諭三法司成材勿棄且有罪能自陳可矜并其家宥之

倭寇浙東磐石

癸酉土魯番總統古麻剌里遣倖答失里等貢馬賜鈔

幣有差。

甲戌設四川茂州儒學。

陝西鄜州請浚故道引水南流復築城垣從之。

沙州都指揮困卽來赤斤蒙古衛指揮塔力尼等遣使貢馬。賜鈔幣有差。

四川越嶲等衛指揮蔡旺等西陽永寧二宣撫司冉興戴亮及九姓長官司土官任福各遣人貢馬俱賜鈔幣。

庚辰廣東南海縣河泊所新增魚課米二百六十六石有奇。番禺縣河泊所新增魚課米一百二十七石五斗有奇。

雲南麓川平緬宣慰司思仁發遣人貢象馬。賜之綵幣。

陝西寶雞知縣尚英奏本縣歲綿花綿布乞就本縣運赴

漢州不必運布政司徒勞人力及陳倉東河等驛積艸可  
二十餘年若將永樂九年草折鈔收支官民兩便悉從之  
河南臨漳縣主簿趙永忠奏河決低下土田不堪耕種乞  
令被災之民別於漳河旁近擇高阜荒地開種從之

乙酉董卜韓胡地面頭目南科遣人朝貢且言容隆蒙調  
門二招討侵掠鄰境請兵伐其罪命賜絳幣降勅以別  
遣人令彼改過若其稔惡不悛發兵未晚諭之

友帖衛指揮亦令哈建州衛千戶牢若禿等奏願入開原  
及自在州居住從之賜資如例

丁亥哈密回回馬黑麻哈非思遣人貢礪砂命禮部給

鈐

六月內官鄭和等使西洋諸番國襲執錫蘭王亞烈苦柰兒歸獻俘。命姑釋之擇其屬之賢者嗣立。

時苦柰兒貪暴不輯睦鄰國數邀劫其往來使臣諸番皆苦之和等奉使歸經其國苦柰兒遂誘和至國令其子納顏索金銀寶物不與潛發番兵數萬劫和舟而伐木拒險絕歸路使不得相援和覺之卽擁衆回船路已阻絕和語其下曰賊大衆旣出國中必虛且謂我客軍孤怯不能有爲出其不意攻之可以得志率所領兵二十餘萬間道急攻王城破之生擒苦柰兒并家屬頭目番兵復圍城和與戰大敗之遂以歸。上曰蠻夷禽獸耳何足深較命禮部擇其屬之賢者立爲王遣還國并



赦苦柰兒遣歸

右庶子楊榮奔喪還起復至京召對閩中民情風俗効  
戶部優免其家徭役

會通河成

可以汶泗爲源汶水出寧陽縣泗水出兗州至濟寧而  
合置天井閘以分其流南流通於淮而新開河則居其  
西北流由新開河道東昌入臨清計三百八十五里自  
濟寧至臨清置十五閘以時啓閉舟行便之

逮交趾右叅政解縉下獄

先是縉入奏事適上北征見皇太子而歸上還

京漢王言縉驕上遠出覲儲君無人臣禮上怒時

徵討王汝玉亦以罪謫交趾。縉偕汝玉趨廣東娛嬉山水。且言請用數萬人鑿贛江以便往來。上大怒曰：「爲臣受事，則引而避去，乃欲勞民如此！」併汝玉俱下獄。周宗範謝垣伏誅。

七月，交趾諸將英國公張輔、黔國公沐晟等敗賊黨阮師胡、具鄧景異等于九真州。月常江尋復敗黎蓋兵于臨安，殲之。

戶部言賑北京臨城縣饑民三百餘戶，給糧三千七百石有奇。上諭：「今後但遇水旱民饑，開倉賑給，毋令失所。」

上曰：「大旱民饑，隋文帝不發倉賑，聽民流移，末歲計所積可供五十年。今國家儲蓄，上以供國，下以濟民，故豐。」

年則歛凶年則散但有土有民何憂不足隋開皇間倉廩雖豐民心不瞻煬帝無道遂至滅亡前監具在

八月工部尚書宋禮等百六人開會通河畢還京

工部尚書宋禮請疏沙河築堰從之

禮言會通河以汶泗爲源夏秋霖潦泛溢則馬常泊之流亦入焉汶泗合流至濟寧分爲二河一入徐州一入臨清河流深淺舟楫通塞繫乎泊水之消長泊水夏秋有餘冬春不足非經理河源及引別水以益之必有淺澁之患今汶河上流自寧陽縣閘已築壩堰使其水盡入新河東平州之東境有沙河一道本汶河支流至十里口通馬常泊比年流沙淤塞河口宜趁時開濬況沙

河至十里口。故道具存。不必施工。河口當濬者僅三里。河身宜築堰者計百八十丈。從之。

命右庶子楊榮等主考應天鄉試。命宴于本府。

撤棘取中式舉人徐則寧等三百名。

滿剌加國王拜里迷蘇剌率其妻子及陪臣入朝。

九月。通政司言。黃巖民告豪民持建文時士人包葬古所進楚王書稿。與衆聚觀。書中有干犯語。請法司治之。勿聽上曰。此必與豪民有怨而欲報之。朕初卽位。命有司

凡建文中上書有干犯語言。皆朕未卽位以前事。悉毀之。有告者勿行。今復行之。是號令不信矣。況天下之主。豈當念舊惡。如唐之王魏。太宗素宿憾而信之。卒相與

成治功。帝王之度如海納百川無所不容。故能成其大。豈可一一追咎往事。

皇太子令庶子楊榮侍諸皇孫讀書。文華後殿。

皇太子諭諸皇孫曰。此皇祖近臣。汝輩當禮敬。榮講授有程度。諸皇孫多所進益。皇太子召榮獎諭切至。且曰。他日學成。卽汝訓迪之功也。榮在春坊。每進講罷。必從容以正心務德親賢去邪尚儉戒逸之言進。深見嘉納。或訪以正務。必陳其切要。及先後緩急施行之序。皆懇切無少避忌。

十月。詔重修太祖高皇帝實錄。

上以前監修總裁官李景隆茹璚等心術不正。又成於

急促未極。精詳巡幸。至北京之初。命胡廣等重修。至是命姚廣孝、夏原吉爲監修官。胡儼、蒲淮、楊榮爲總裁官。楊士奇、金幼孜等爲纂修官。皆賜勅勉勵。

兵科給事中倪峻言有內官奏千戶不待朝命擅發兵捕盜。請治其罪。上以千戶無罪。戒諭之。

上曰。國家養兵。正以除奸衛民。境內盜發。千戶能率衆捕之。使民免於暴橫。正是能盡其職。若必待奏而後發兵。小則亡逸。大則勢張。民受害多矣。聞豎不達事體。爾亦從其言乎。峻惶恐而退。

哈密忠順王脫脫卒。封免力帖木兒爲忠義王。

十一月。交趾總兵官英國公張輔率舟師追捕反賊陳季

擴等於海上梟賊首一千五百餘人以徇。餘賊散走林莽泥澤中盡殲之。

自是廉福安諸州縣皆平。

哈密忠義王免力帖木兒受封。尋卒。封孛羅帖木兒爲忠順王。

上御奉天殿立。皇長孫瞻基爲皇太孫。冠於華蓋殿。詔蠲陝西山西河南自永樂八年前拖欠稅糧。

十二月遣指揮木答哈阿升哥賚諭朵顏福餘泰寧三衛頭目。如能悔過卽還所掠戍卒。仍納馬三千贖前罪。不然發兵誅叛。悔將何及。

諭曰兀良哈之衆數爲韃靼抄掠不安。乃相率歸附。誓

守臣節我太祖高皇帝矜厥困窮設福餘朵顏泰寧三衛而授爾等官職俾各領其衆臣屬旣久後竟叛去及朕卽位復遣人來朝朕畧其舊過加意撫綏數年以來生聚蕃息朝廷于爾可爲厚矣比者爾等爲本雅失里所脅掠我邊卒又遣苦列兒等給云市馬實行窺伺狡詐如此罪奚可容

閏十二月令百官條上軍民利病

詔在內七品以上在外五品以上及縣正官各舉堪任牧民風憲者吏部考驗如果賢能量才擢用其不職者連坐舉主

虜酋阿魯台遣使納款請併屬女直吐蕃諸部不許



上問侍臣多請許之黃淮獨曰此虜狼子野心使各爲心則易制若併爲一則難圖矣此舉實其姦謀也上顧左右曰黃淮如立高岡無遠不見諸人如處平地所見惟目前耳乃不許阿魯台之請

鑄永樂通寶錢

壬辰永樂十年正月丙戌朔

上御奉天殿受朝賀宴文武羣臣及四夷朝使

戊子封右軍左都督吳允誠爲恭順伯

刑科給事中曹閏等劾定國公徐景昌趨朝不循禮度又縱家奴犯法乞垂懲戒上令景昌從師講學勿預政事已丑刑部都察院六科劾奏天下朝覲官千五百餘人勘

合多未完請付法司究治。上命各部條目已完者八十餘員賜鈔五十錠復職。餘未完者亦宥復職。

朝覲官各上政務。命六部議便于民者行之。言有不當勿問。

上問鴻臚寺及六科曰。前日命朝覲官言民瘼已言者幾人。對曰百十人。上曰。一郡一縣未必都無一事可言。都無一民不安。盡今日皆須言。緘默者罪。于是各官悉上所言。

福建閩清縣言。本縣及福清糧歲皆分運福州鎮東三衛。本縣近福州而涉海赴鎮東福清甚近。鎮東乞各從近便迎納從之。

廣西都結州言本州糧歲運納太平守禦千戶所行四百餘里險阻甚難南寧至本州可通舟楫乞改納南寧爲便從之

乙未兩淮都轉運鹽使鮑軍等言近年朝廷以管道召商中納北京鹽糧令各處罷中往歲所中鹽停支令淮揚二府人民每歲食鹽五萬餘引亦宜暫停候北京罷中然後納與從之

山東濟寧州同知潘叔正言兗州東昌定陶等縣地曠民稀宜擇青萊諸郡丁多田少者分居就耕蠲役三年從之河南洛陽知縣姚弘言本縣舊有水田歲輸粳米今爲陸地乞令納粟從之

廣東樂昌知縣徐善惠言本縣耕農多稻少麥請自今止令輸米從之。

丁酉大祀 天地于南郊。

上還御奉天殿文武羣臣行慶成禮。

戊戌以郊祀禮成宴文武羣臣及四夷朝使。

庚子元宵節賜文武羣臣宴聽臣民赴午門外觀鰲山三日。

命中官賜戶部尚書夏原吉母鈔二百錠。

原吉侍母往觀鰲山 上聞之曰此賢母也卽其家賜之。

壬寅諭吏部尚書蹇義禁差守令。

諭曰守令郡邑之長昔人每戒數易蓋牧守之寄甚重  
須久於其職比聞諸司以造作雜務輒差正官意在成  
事之速此殊不識大體自今一應公務不許擅差守令  
俾專職理民。

癸卯復設陝西金州千戶所東洋西洋二關

甲辰罕東土酋屢爲寇盜劫掠遣指揮康壽賫勅戒飭  
之

播州宣慰司楊昇遣兄亮貢馬以白金文綺賜之

保清宣慰司彭勇烈遣人貢馬賜之鈔幣

思州宣慰田琛母楊氏來朝貢馬賜之鈔幣

乙巳趙王高燧還北京皇太子親送之江東門

丙午寧夏總兵官安遠侯柳昇械送叛賊察罕反等至京誅之。

山東左布政周璟言大同歲用馬草皆令大原平陽澤潞運給往復三千里民用困乏而大同所屬天城陽和等衛地皆平川秋多青艸乞令以時採儲往給大同以太原平陽澤潞諸郡縣艸儲于附近驛舍從之。

丁未陞國子司業趙季通童子莊爲趙府長史。

勅都督賈義尚書宋禮領舟師運糧赴北京。

戊申都察院左僉都御史劉翥劾中軍都督郭義尚寶司少卿朱琇孟春時享太廟無故不陪祀。命鞫之。

己酉巡按山東監察御史許堪言去年衛河水溢河岸倒

塌乞勅有司修理。命工部移文尚書宋禮相度措置。  
陝西隴州言民饑。命戶部發州倉粟一萬二百三十石  
賑之。

河南靈寶永寧二縣言今旱災并八年虧糧乞折輸鈔帛。  
從之。

山西平陵縣言連歲旱澇民食不充乞以八年九年糧折  
輸鈔幣從之。

庚戌雲南景東等府土官知府陶幹等遣人貢馬。賜鈔  
幣有差。

命國師班舟藏卜爲大國禪師把湛查包刺麻俱爲國師。  
辛亥法司劾山東都指揮吳旺以公事決人致死當斬。

上以非私事姑宥之。

壬子令法司凡奸民越訴當笞者免罪。令挈妻子徙北京良鄉涿州昌平武清爲民種田。給路費。三年始供租調。誣告犯徒流笞杖者亦免罪。挈妻子徙盧龍山海永平。興州爲民種田。不給路費。一年供租調。

癸丑貴州宣慰司安卜葩遣人貢馬。賜之鈔幣。

山東稷山等縣耆老言歲歉民饑採蒺藜掘蒲根以食。乞賜寬貸徵賦。命戶部遣官賑濟。其布政司及所屬郡縣官蔽不以聞者悉械送京師論罪。

甲寅陝西淳化縣及河州軍民指揮司言水旱田稼不登。乞今年稅糧折輸從之。



置濟寧州南城垣。

二月庚申。山西猗氏縣耆民張彥清等言。累歲旱澇。田稼不登。乞以八年九年逋租折鈔帛。命悉除之。

辛酉。詔免山西河南永樂八年以前逋租。

命翰林侍講楊士奇。金幼孜。主考會試。賜宴禮部。

壬戌。勅戒靖江輔國將軍。贊億。用錢債繫人妻子。鬻居以償。械左右小人送京師。

勅諭兵部及各處總兵官張輔等。武職自永樂十年二月初七日以前。有犯笞杖徒流遷徙罪名。皆宥復職。如特恩與功再犯。必誅不赦。

置河間衛。命兵部凡北京之民。見在遠衛爲軍亡故者。

其戶丁就補河間新衛別調人補之。

乙丑勅甘肅總兵官西寧侯宋琥與豐城侯李彬熟計諸降虜及新附者悉送京師設法隄備毋致逃竄。

丙寅戶部言湖廣五寨長官司業濠等七洞人民歲課硃砂近因酋賊殺虜累歲有虧命除之。

戊辰命禮部尚書呂震諭考官楊士奇金幼孜精選試卷諭曰數科取士頗多不免玉石雜進今取毋過百人其務精選收散木累百不若得良材一株也。

庚午勅平江伯陳瑄都督宣信率舟師海運糧餉赴北京乙亥琉球國山南王汪應祖遣使臣阿勃吾斯古貢方物賜宴及鈔幣。

廣東信宜縣根竹洞瑤首陸仲八等來朝。賜衣及鈔。

丁丑改戶部右侍郎王彰爲都察院右副都御史。

庚辰遼王植有罪，削其護衛及儀衛司，止給軍校厨役三百人，備使令。

命戶部減涼州鹽糧則例，召商中納，以供軍餉，待糧用充足，則仍其舊。

定納涼州鹽糧，淮浙鹽每引三斗五升，河東每引二斗，四川每引一斗五升。

辛巳，禮部奏會試取中式舉人林誌等一百人。賜考官楊士奇金，幼孜宴于本部。

癸未，居太平都桑歌失里弟完者克貢駱駝。賜鈔幣紵。

絲綾衣各一襲。

三月丁亥命豐城侯李彬充總兵官率兵討甘肅叛寇八月思朶羅歹等令恭順伯吳允誠等悉聽節制

戊子廷策會試中式舉人林誌等百人及前科未廷對舉人林文灋等六人賜馬鐸林誌王鉦進士及第黃乾等三十名進士出身黃祖等六十四名同進士出身

是科仍賜宴于會同館

辛卯賜烏思僧丹竹領等禪衣及鈔

壬辰鑄征蠻將軍印

癸巳命進士原習譯書蔣禮趙勗徐俊何賢潘勤黃裳羅興楊榮張觀馬馴王橫劉濬胡讓邵進宋顯復爲庶吉士

仍隸翰林餘三甲進士分刑部都察院理刑。

定州衛軍趙四獻馬產驢有肉角類麟陞四爲小旗賜鈔一百錠綃四疋。

甲午夜月犯軒轅大星。

乙未兀速麻河等處女直野人頭目把失等三十人來朝命爲法因河衛千百戶鎮撫賜冠帶襲衣鈔幣。

丙申雲南左叅政呂明善言武定尋甸廣西三府居民繁庶請設學校從之。

上曰學校風化所係人性之善蠻夷與中國無異特在上之人作興之耳。

增置應天府都稅司副使分管三山門外沿河塌坊官稅

戊戌女直野人頭目阿刺孫也兒怯等來朝。賜衣鈔幣。  
辛丑雲南廣西府土官知府阿覺鎮康州土官知州曩光  
孟璉長官司長官刁懷罕特冷土官班野騰衝千戶所土  
官千戶汪用洱海衛土官百戶楊祥鳳溪長官司司長官牙  
各遣使貢馬及方物。賜鈔及文綺表裏有差。

壬寅賜漠北來歸韃靼瓦剌歹等宴。

甲辰蠲北京所屬水災郡縣租稅。

丁未都指揮程忠等使哈密還忠義王孛羅帖木兒遣陪  
臣阿都兒火者貢馬謝恩。賜鈔千錠文綺二十疋。

哈的蘭之地回回賽因哈里等來朝貢馬。賜賚遣歸。

戊申勅武義伯王通等天壽山營建將完工匠役久戶無

次丁者悉遣歸仍命所過官司給行糧。

修浙江平陽縣捍湖隄岸。

河南遂平縣水決河隄沒田四十餘頃被災一百三十六戶。皇太子遣人賑恤之。

己酉雲南沅江軍民府土官中旺等貢馬及金銀器。賜襲衣鈔幣有差。

庚戌交趾太原府同知貢琛言交趾亡故官吏妻妾路遠不能歸往往更嫁有傷風化乞今後官爲續食遞送還鄉守制從之。

壬子失里線等衛女直野人頭目桑哥失里哈等五十一人來朝。命爲指揮千百戶鎮撫悉賜鈔幣。

癸丑。賜翰林院學士胡廣等五員二品織金紗衣各一襲。  
甲寅。陞順天府知府張貫爲府尹。同知嚴節爲府丞。

官制視應天府。其大興宛平俱陞正六品。

設祿谷長官司。隸雲南鎮沅府。

四月丁巳。陞鴻臚寺左寺丞許廓爲工部右侍郎。

韃靼瓦剌歹奏願居北京。從之。賜予如例。

庚申。浚北京通流等四閘河道。一萬七百三十七丈。

壬戌。工部尚書宋禮奏。自衛河東北至舊黃河。一十二里。  
內五里舊河有溝渠。五里係古路。二里係平地。今開河泄  
水以入舊黃河。則至海豐大沽河入海。上命候秋成爲  
之。



癸未。勅開平備禦成安侯郭亮自開平至懷來宣府萬全興和各山頂置五砲架有警卽發。庶易爲隄備。

徙廣寧衛鐵山馬市于團山。

都察院右副都御史王彰劾陝西按察司僉事馬英。激肅州衛寄居回回指揮哈刺馬牙爲變。殺御史陳錡。都指揮劉秉謙大掠而去。命磔英于市。

江西安仁知縣曹潤奏請復設惠民藥局。養濟院從之。甲子。諭兵部。飭勵太僕及各都司衛所管馬官。各盡乃心。歲終具實數來聞。當考勤怠施賞罰。

都察院右副都御史王彰言。監察御史陳孟旭受賍枉法。當絞文獻盜課銀當斬。皇太子從之。

涼州衛都督同知柴別力哥等七十七人來朝貢馬。賜鈔幣有差。

福餘三衛指揮使喃不花等如勅書遣人納馬。贖擄掠邊卒之罪。

丁卯四川益興井竈丁言本井近年崩塌修淘不通致虧課額請開煎塩亭縣長豐天城二井從之。

己巳哈的蘭回回僧人馬黑哈蠻哈密回回百戶阿馬丹等來朝貢馬及方物玉璞。賜賚有差。

庚午命築遼東開元西門土城以處韃靼之歸附者。

朝鮮國王李芳遠遣陪臣閔海翼琉球國中山王思紹遣使坤宜堪彌等貢馬及方物。萬壽聖節賜鈔及文綺。

表裏有差

河南許州襄城長葛臨潁泌陽等州縣民饑。命戶部給粟萬二千五百二十六石賑之。

辛未。萬壽聖節。御奉天殿受朝賀。大宴文武羣臣及四夷朝使。

癸酉。戶部言浙江臨安縣民因水災虧允鹽糧萬三千一百八十餘石。請令以鈔折輸。命蠲除之。

甲戌。涼州衛都督僉事阿魯卜里等及遼東自在安樂二州指揮僉事賈你等來朝貢馬。賜鈔幣襲衣。

山西平陽翼城等郡縣民饑。遣戶部員外郎孫恪賑之。凡十六萬九千六百餘戶。給粟三十一萬四千二十石。

有差。

己卯。忽石門指揮僉事兀丁哥建州衛副千戶可奚等自陳願居自在安樂二州從之。賜予如例。

辛巳。賜在京文武百官夏布有差。命直內閣學士胡廣等五員賜同尚書。

擢進士胡槩蕭常弋謙鄧直李曰良金庠等二十三名。監生張勤等一十六名爲監察御史。

山東萊州府民饑。命戶部遣官發粟賑之。

計粟五十八萬三千八十石。

五月甲申朔。賜在廷文武百官扇。

乙酉。瓦剌順寧王馬哈木等遣其知院海峇兒等請天兵。

除阿魯台乞軍器及賞賚部屬。命宴賚其使而遣之。

命山西中鹽商民於宣府萬全懷來興和五衛輸納一萬  
備官軍俸糧。

都察院右副都御史王彰言金吾右衛指揮李嚴逐母不  
養。命磔于市。

丙戌命禮部揭榜申明洪武僧道嚴禁。

諭曰。佛道二教。本以清淨利益羣生。今天下僧多不守  
戒律。民間修齋誦經。動輒較利厚薄。又無誠心。甚至飲  
酒吃肉。遊蕩荒淫。畧無顧忌。又一種無知愚民。妄稱道  
人。一槩蠱惑。男女雜處。無別敗壞風化。洪武中。僧道不  
務祖風。及俗人行。瑜珈法。稱火居道士者。俱有嚴禁。卽

揭榜申明。違者殺不赦。

丁亥。賜哈密忠義王孛羅帖木兒使臣阿都火者宴。

廣西河池縣民言縣有銀礦大發。長沙民言其鄉產銅。採煉可獲厚利。上皆斥之。

上曰。獻利以圖僥倖者。小人也。國所愛在民安。不在于利。

己丑。勅鎮守興和都指揮王煥等。阿魯台或進馬歸附。須詳察其實。勿遽納之。

庚寅。修四川棧道。

辛卯。哈密忠義王孛羅帖木兒請以僧速都剌史爲都綱。從之。

勅甘肅總兵官豐城侯李彬所獲叛賊闊脫赤人口就給原獲官軍馬駝令軍衛牧養

四川按察司副使周南言涪州并長壽縣見積倉糧五萬餘石約可支十年今貴州各衛所俸糧俱于重慶民倉支給如將涪州長壽倉新舊兼支可免朽腐從之

丙申陝西秦州民張源言鞏昌臨洮等府歲稅運甘州相距二千餘里皆陸行甚艱乞收儲本處倉遇農隙令附近州縣民運輸蘭縣倉自蘭縣至甘州每五十里設站一或役刑徒或令官軍轉輸庶少蘇民力從之

辛丑命都督僉事費瑄督運衛輝館陶倉粟二十一萬四千四百五十餘石赴德州

河南開封等府縣水災。免糧四萬三千四百二十石有奇。哈密衛指揮虎禿帖木兒等來朝。貢馬及礪砂。賜之鈔幣。

甲辰。江西寧縣大雨。山水泛漲。漂民舍。事聞。皇太子遣人撫恤。

丙午。思南故宣慰使田大雅母楊氏率官屬六十五人來朝。貢馬及方物。賜鈔文綺紗帛有差。

辛亥。武清縣民一百一十餘戶遺原給報効蠲芻糧徭役牒。有司復徵其徭役事。聞。悉蠲之。

六月甲寅。廣東瀧水縣丞馮原泰善撫諸徭。陞爲德慶州判官。



丁巳禮部言滿刺加國榜葛刺國遣使朝貢將至命差人往鎮江府勞之

戊午建武當山宮觀命隆平侯張信駙馬都尉沐昕董其役

巡按山西監察御史

劾訓導

經過平陽朝王

王免見遂造王府官飲酒當逮問不聽

一十

上曰王自免禮固非其不往見王府官必其交親故造之飲酒敘歡亦人常情無罪今外夷來朝者與人交易尚不禁人況與王府官往來乎不聽

戶部言四川羅召樊家二井崩裂虧歲課近有明月太平二井比舊額稍增宜開煎從之

己未湖廣按察司僉事胡璉言武陵縣民居湖泊不宜種麥乞令納米從之

庚申以韃靼把都禿哈刺爲百戶賜冠帶襲衣及鈔幣浙江按察使周新言永樂九年湖州府所屬被霖潦盡沒窪田負糧十七萬二千四百餘石有司不與分豁民被迫責日就逃亡命戶部亟遣人覆實蠲免

辛酉建州衛指揮僉事李顯忠奏塔溫新附人民缺食命戶部遣人發粟賑之

上曰薄海內外皆吾赤子遠人歸化尤宜存恤

壬戌增建習譯書館二十楹

癸亥賜國子監琉球國雲南四川官民生懷得等一百三

十六人夏布藍衫絛靴

刑部侍郎張本言浙江送至奸惡鄭公智外親宋濂之孫請罪如法上以濂勞宥之遣歸

河南鄆陵臨漳二縣大水沒田禾事聞皇太子遣人撫視

夜月犯心宿後星

戊辰山西左布政使周璟言平陽榮河太原交城捕蝗已絕命巡按御史驗之

庚午諭兵部尚書方賓靖難故官子弟皆幼弱可令襲職給全俸俟長成比試不中罪之未晚

諭曰朕適見所引故官子弟比試者不覺愴然蓋初舉

義之時其父兄忍饑冒寒謂苦百戰不幸有死于戰陣或沒於疾病今觀其子弟弟稚弱若令如例比試而後襲職必未謂武事而謂是絕其俸祿無以自存矣。

辛未賜靖難子孫襲職者鈔有差。

上謂侍臣曰諸將與朕同起艱難亦當同享安樂而今有亡故不逮者矣雖有子孫襲職豈能悉得其所昨在官中對諸子諸孫甚樂因念及諸將子孫心不能已故加之恩故朕於一飲一食之際未嘗不思艱難之時學士胡廣對曰陛下所以得衆心保洪業蓋在於此工部主事蘭芳按視塩中隄決河請依舊河岸捲土爲掃樹椿捍禦之不重爲民患從之。

湖廣荊州武昌漢陽黃州常德等府大水沒民廬舍田禾  
事聞 命戶部遣人巡視撫綏

壬申浙江按察司奏浙西水潦通政趙居住匿不以聞逼  
民輸稅 命戶部遣人覆視但田禾壞於水者蠲其稅民  
被水甚者官給粟賑之

滿刺加國拜里迷蘇刺遣姪西里撒麻蘭禮牙等貢方物  
癸酉禮科給事中引法司所逮犯人內一二人欲有所陳  
訴錦衣衛官促之起遂不得陳 上惡其蒙蔽戒錦衣衛  
官繼今敢爾者必誅

甲戌勅戶部令發粟賑河南饑民凡郡縣及朝廷所遣官  
日擊民艱不言者悉逮下獄

勅曰朕爲天下主。所務民安而已。民者國之本。一民不得其所。朕之責也。故每歲遣八巡行郡邑。凡歲之豐歉。民之休戚。欲周知也。近者河南民饑。有司不以聞而往。往有言穀豐登者。若此欺罔。獲罪於天。此亦朕任非其人之過。

陝西西安等府老人詣闕謝賑濟恩。命給道里費遣還。上召問老人。今歲禾稼如何。對曰來時甚茂。上曰禾稼雖茂。民力未甦。凡所借用官糧。今年不責爾償。候下年豐熟。令償老人叩頭謝。上命戶部山東山西皆准此例。凡經賑濟者。悉免詣闕謝恩。

乙亥詔賽弗丁嗣爲榜葛刺國王。賜錦綺襲衣帳幔傘蓋。

磁器等物

丙子諭工部修國子監。

通政使奏有軍官舍人以其父嘗遇海賊退避爲平江伯所殺不當襲今乞矜憫。上以其越制祈恩命兵部發成交趾復以爾能奮勇立功則朝廷不終棄勉之。

丁丑鎮守遼東都督劉江等今阿魯台遣人修貢心不可測毋怠邊備。

戊寅命北京行後軍都督府量撥軍夫運宣府萬全衛倉粟二萬石往開平備軍餉。

壬午命幼軍無妻室者官爲婚配仍給鈔資其家。

七月丙戌賜在京文武堂上官毳羅綿被有差直內閣學

上胡廣等五員賜同尚書。

直隸吳江長洲崑山常熟四縣水災免糧一十三萬八千六百九十石有奇。

順天府言盧溝河水漲壞橋及堤岸八百二十丈壞官民田廬溺死人畜。命戶工二部遣人撫綏修築。

丁亥巡按福建監察御史陳智劾右布政張拱辰贓罪。

命都察院追鞠之。

戊子廣西結倫州土酋馮郎黃等來朝貢方物。賜之鈔幣。

己丑諭兵部選韃官閑居老成謹厚者教民畜馬。

居永平薊州通州者就留本處教民居真定定州者赴



順天等府教民但令教飲飼之宜若孳息不及數者無預。

辛卯寧夏總兵官安遠侯柳昇奏請築察罕腦兒舊城河凍之時撥軍邏巡賜勅以難守諭之。

勅曰修城之策固善未知城成之後守者當用幾人。人少則難于守備多則難于餽餉朕意此城不過關防一二逃卒若寇猝至不能禦之反以資之如何爾更熟議如果便利卽聽修築。

甲午鑄永樂通寶。

丙申封耶把乃那爲錫蘭山國王。

先是國王亞烈苦柰兒罪執至京上命擇其屬賢者

立之。至是禮部詢國人咸謂耶把乃那賢。遂遣使立之。  
時羣臣請誅亞烈苦柰兒。上曰。蠻夷禽獸不足誅。赦  
之。亦遣歸。

指揮岳山等七十二人使北虜還。進馬四百四十七匹。

命禮部給紗絹綿布償之。

丁酉。賜文武百官西洋布有差。

辛丑。免四川通江縣歲輸不及茶課三百七十萬四千四  
百斤有奇。

後軍都督薛祿等言。各衛軍官子弟皆有進用之日。宜及  
時操練武藝。

壬寅。勅甘肅總兵官西寧侯宋琥等。土韃軍民終懷反側。

宜徙入蘭縣就糧西寧衛土官指揮所管番民調其精壯赴野馬川防寇。

原任四川會知縣張邦達坐累戍邊以薦出使榜葛刺還奏稱旨擢河南道監察御史。

癸卯諭都察院令都布按三司及巡按御史事之當行者所司自行不許中官干預。

乙巳朝鮮國王李芳遠遣陪臣李安愚奉箋貢金銀賀皇太子千秋節賜之鈔幣。

丙午皇太子千秋節免賀禮。

丁未勅寧夏總兵官安遠侯柳昇今叛虜毛哈刺等窮寇無食或來擾邊宜嚴備禦。

浙江嘉興縣水災。免糧三千六百一十五石。

戊申遣中官吳賓等賞勅賜爪哇國西王都馬板錦綺紗羅綵絹千匹并文綺襲衣。

己酉浙江平陽縣獻嘉禾百六十四本。命戶部遣人巡視四方水旱不可恃此。

四川布政司奏天光井雲吉井開煎年久歲虧鹽課。今安岳縣古跡竹筒大井小井比舊有增。宜令開煎從之。

八月癸丑朔交趾總兵官張輔等敗賊黨陳磊等于神投海。檻鄧汝戲等三十五人赴京師。

輔率舟師安謨海口遙見賊舟由大安如神投海。旦率都指揮方政等擊之。賊舟四百餘艘亦出神投海外。分

列爲三時北風輔督衆衝其中堅賊氣銳甚官軍奮力直前與賊聯舟刀槊競進火器迅發賊不能支卽開船走官軍追躡之相與鈎束殊死戰自卯至巳賊大敗生擒僞翊衛大將軍陳磊龍虎將軍鄧汝戲黎目金吾武衛等將軍校尉安撫團練巡檢等使阮林等七十五人及其從賊千餘人斬溺死者無筭賊黨阮師等望風奔潰輔亟督軍出海追之不及而還磊等四十人被重創皆斬以徇

甲辰諭兵部尚書金忠等選民間子弟年十七至二十勇健有才藝者充皇太孫隨從

上曰皇太孫年長有志略朕令其學問之暇兼講武事

其遣人往直隸應天及江北鳳陽滁和等府州北京山東山西陝西河南四川湖廣境內選民間子弟年十七至二十勇健有才藝者官給路費廩食送京師

勅北京提督養馬官從公考驗軍士有用心養馬孳生及數百人賞鈔五錠不可冒濫其提督若仍循舊弊不悛改者罪不赦

已未勅邊將凡關外如長安野狐等嶺及興和迤西險惡之地皆崇石垣深濠塹以防虜患

庚申樂亭縣丞楊直言北京人民在各衛爲兵死徙者戶無餘丁遺孤老無依乞給與口餉遣還故土就親存活從之

辛酉禮部言淳泥國王遐旺偕其母妻等來朝已至福建命郎中高謙等往宴勞之。

修廣東新會圩岸二千餘丈。

壬戌山東定陶河南中牟等縣者民詣闕謝賑濟諭戶部其未至者移文止之。

上曰天子以天下爲家則以天下爲休戚比念民饑令有司發粟賑之此國之恒典況郡縣儲蓄正爲民計而使人廢其農業遠來謝恩非朕意也其令止之。

占城國王占把的賴遣使部該濟標等奉表貢象及方物賜鈔幣有差仍賜部該濟標冠帶。

丙寅旦壽星見丙位。

女直野人頭目淮土奴塔失等百七十八人來朝貢方物  
命爲指揮千百戶賜誥印冠帶襲衣及鈔幣有差

己巳皇親徐赫匿逃民法司請罪之 命治如律

上詔赫曰踈遠小人尚相戒守國法不敢違汝乃敢狎  
恩先衆犯法昔中山王勳戚大臣謹守法度不敢縱越  
分毫能流慶子孫汝今縱肆如此豈是受福之道赫惶  
恐叩首 上顧法司曰不可以私廢公治之如律

庚午諭陝西行都司都指揮史昭宜與西寧侯宋琥豐城  
侯李彬協心併力關防涼州土韃軍民老的罕等徙入蘭  
縣就糧

癸酉擢庶吉士劉翀爲禮科給事中同吏科給事中張瑛



國子監學錄王讓侍 皇太子讀書。

上曰朕聞讓孝于其親故擢用之。

甲戌致仕右軍都督僉事趙清言其子琮爲府軍後衛指揮使坐罪謫立功乞寬貸之以終養餘年 上憫而從之賜清鈔六十錠仍命工部檢勘功臣子孫坐事謫戍者悉以名聞。

乙未修居庸關水門。

丁丑戒諭甘肅總兵西寧侯宋琥豐城侯李彬互有猜疑宜改心易慮務在和協毋致悞邊事取罰。

重建天禧寺。

庚辰甘肅總兵宋琥等秦涼州土韃軍民老的罕等逃叛。

都督何銘等領兵追及之。銘戰死。擒獲叛賊弩峇兒伯顏等九百餘人。械送京師。老的罕等以衆遁。

九月癸未朔。湖廣黃梅縣耆民言江水泛溢。圩岸坍塌。傷民田千八百二十餘頃。請闔郡丁夫修築。從之。

戊子。勅宣府總兵武安侯鄭亨率師還京。

辛卯。重陽節。賜文武羣臣宴。

勅兵部。天下衛所軍職。自今日以前。犯笞杖徒流。當充軍及立功者。已未發落。悉復舊職。月給半俸。仍于本處立功。雖犯死罪。亦令復職於本處立功。候有功給俸。

甲午。遣官祭天壽山。亡沒夫匠。命有司函骨歸葬。仍復其家二年。

浚松江府上海蟠龍江袤十四里廣十丈。

乙未以廣西潯貴等府縣徭蠻作亂除糧三千六百石工部主事閻芳言分導中灤河流事宜從之。

芳言天下水惟河爲大故水患惟河爲甚今於中灤分導河流使由故道北入于海河南之民免於昏墊誠萬世之利然緣河新築護岸掃座止用蒲繩泥艸不能經久臣愚以爲若用木編成大囤若欄圈然置之水中以椿木釘之中實以石却以橫木貫於椿表牢築堤土則水可以殺隄可以固而河患可息如允臣言乞令河南近河府衛徵軍民於農隙採木春和修砌

都察院右副都御史王彰劾山西叅政何涑貪淫不律等

事 皇太子逮下獄。

丁酉湖廣高羅安撫司木柵長官司各遣人貢方物。賜鈔幣遣還。

戊戌喃渤利國王馬哈麻殺蘇門答刺國王宰奴里阿必丁各遣使貢方物。賜國王印誥及錦綺紗羅綵帛。

己亥勅鎮守遼東都督劉江等瓦剌軍馬欲襲阿魯台。當嚴固守備。不得怠忽。

甲辰陞工部主事蘭芳爲工部右侍郎。

初芳爲吉安知府有善政。坐事謫爲辦事官。專治河渠。以通漕運。累有建明。卽還授都水清吏司主事。至是尚書宋禮薦其才。故有是命。

勅武安侯鄭亨巡視興和各處關隘屯堡凡衝要處有坍塌者壘石甃砌務在堅固

乙巳擢山東昌邑訓導戴綸爲禮科給事中侍皇太子讀書

丁未渤泥國王遐旺等入朝貢方物命宴于奉天門宴王母于三公府光祿寺旦暮給酒饌

十月癸丑朔享太廟

甲寅修山東安丘縣洹河堤岸

戊寅平江伯陳瑄于蘇州嘉定縣青浦築土爲山立候表識工成賜名寶山

方一百丈高三十餘丈

宣府總兵官武安侯鄭亨等請調大同前衛帶管東勝衛中左中前所陽和衛帶管東勝衛前所俱于大同左衛增益驍衛從之。

平江伯陳瑄築揚州海門縣捍湖堤岸萬八千餘丈。已未命三法司出繫囚之輕者輸作贖罪有病令遣醫療之。

諭曰古人不得已而用刑故存欽恤後世以治刑爲能事則必流於刻刻吏必爲朝廷歛怨於平民卿等不宜效有此者宜速改之。

老嫗宣慰使刁線歹遣頭目刁弄等貢方物。賜絨錦綺羅各五丈。

庚申復設湖廣南渭州以彭仲才爲知州

遼海衛指揮王謹等所招野人女直付羊右等願居開原授督罕河衛指揮千戶等官循例給賜

癸亥命鎮守交趾都督韓觀督運廣東糧萬石赴交趾給軍食

甲子遣使賚勅撫諭底里國王馬哈木納撲兒國王亦不刺金各賜絨錦金織文綺絲絹等物

乙丑府軍右衛軍人李士文妻一產三男事聞命循例優給

夜月掩犯昴宿

丁卯命皇太子演武于方山是日甘露降方山遂採以

進羣臣表賀。

置遼東境外滿涇等四十五站。勅提領那可孟嘗等悉恭命毋怠。

巡按四川監察御史滕宗智劾按察使譚友得才質庸下。行止污濁。不可玷風紀。命都察院治其罪。

戊辰。車駕幸城南武崗。

浙江烏程歸安長興臨海等縣水災。免糧一十七萬四千五百石有奇。

浚山東濰縣白浪河。

丁丑。山西繁峙進嘉禾百五十八本。

三法司奏有軍病妻不治湯藥數毆其夫。姑責之。又擊傷。



其姑當就刑不孝之罪刑科不應覆奏。上以刑科遵三  
覆奏之例非擅止之勿罪。此婦卽如法誅之。

戊寅交趾總兵官英國公張輔等軍至惡江。僞少保潘季  
祐等詣軍門降。承勅授季祐交趾按察司副使。管又安府  
事。

於是僞將軍知府觀察安撫招討等使阮士勤陳敏陳  
全最陳全敏陳立阮爽等皆降。

庚辰命浙江湖廣江西及鎮江等府衛造海運船三百艘。  
十一月壬午朔頒賜諸王及文武羣臣大統曆。

甘肅總兵官西寧侯宋琥言叛寇老的罕等逃居依赤斤  
蒙古衛指揮格力尼。亟遣人索之。不發。將爲邊患。命庶

子楊榮會豐城侯李彬經畧。

癸未。通政趙居住奏蘇州逃軍言水澇傷禾。乞免秋糧。及奸民決隄壞禾。冀免稅糧。俱請罪之。命遣官往視。

上曰。言水澇者果逃軍。可止坐逃軍罪。其言決隄車水。求免稅糧。恐無是理。蓋與其勞力決隄車水。曷若勞力治田。田中所入十分。以一分入官。九分入己。豈肯以一廢九。自受饑餒耶。殆非人情。且前時浙江按察司亦嘗言浙西水澇。趙居住不恤民隱。今居住此言。未可信。仍遣官往視之。

甲申。勅西寧侯宋琥陞西寧衛指揮李英勦戮叛寇爲都督。指揮僉事。餘將士有功者各陞一級。并及賜賚。有功劳。

異等者別具來聞當加優賞。

湖廣湘陰廣東海康遂溪二縣以水災免稅糧。

乙酉諭河南等處左叅政等官李冲高謙等七人御史苗貫謝庸等十人佐方岳任風紀皆要職當慎操履務長忠厚戒刻薄其往勉之

兀里奚山等衛女直野人頭目歡只忽等來朝命爲指揮千百戶賜予有差

丙戌修儀真綠江堤岸及夾港溪等處河道

肥河衛指揮僉事木荅哈奏願居遼東東寧衛阿剌山衛指揮伯哈木等願居安樂自在州並從之賜予如例

丁亥開州民三人自陳天壽山營造願父子効力報國

上遣歸勉之。

上曰得無別有所爲乎。命戶部審之。奏父子無別所爲。報効益出誠意。上召至廷諭之曰。爾意誠善。夫爲民欲報國不但効力役。若能安分循禮。務本棄末。修孝弟忠信之行。和於家。厚於鄉。遵奉教令。不犯刑辟。使鄉里倣效。悉爲善人。如此卽是報國。何必出力。汝歸勉之。見鄉人老少亦以朕言諭之。

孟誥土官刁猛甫等遣其家屬貢馬及方物。賜錦綺紗羅綵絹。

戊子。命兵部及五軍都督府。自今有武官子弟襲職者。循洪武比試例。

上曰在營生長者循此例。若田里間出未嘗習弓騎者不可遽責成。須一歲中十試之。

庚寅。賜渤泥國王遐旺冠帶金織文綺衣。并賜其母冠服。其叔及頭目冠帶。

通政司奏有婦告前夫之子不能供養。請治其不孝罪。勿聽。

上問是親生之子否。對曰此婦于前夫亦是繼室。蓋此子之繼母。上曰所謂子母無絕道者。非爲繼母。今繼母改適。卽義可絕。已失節於夫。乃責人不能盡孝乎。所言勿聽。

戶部言雲南通安縣民饑。請以所貯課程小麥賑給。從之。

辛卯冬至。上御奉天殿受朝賀。大宴文武羣臣及四夷朝使。

丙午遣太監鄭和等賫勅往賜滿剌加瓜哇占城蘇門答刺刺魯柯支古里喃淳利彭亨急蘭毋加異勒忽魯謨斯北刺雷山孫刺諸國王錦綺紗羅綵絹等物有差。丁酉山東都指揮僉事李凱等督運衛輝等處糧百六十五萬九千二百七十餘石至北京。

戊戌北京行太僕寺卿楊砥言吳橋至天津等衛大水決隄傷稼。切見德州東南黃河故道及土河乞開二河以分水勢。命工部侍郎藺芳往經略之。

河間獻縣言水決真定之饒陽武強等處隄岸。湔沒下流。

田廬乞集夫修築從之。

辛丑諭兵部尚書金忠嚴禁各衛養馬官軍不許怙勢蹂踐民禾稼仍行按治御史巡察犯者并本伍頭目悉罪之壬寅命揚州等衛造海風船六十一艘。

戶科都給事中胡濙奏陝西通年積草浥爛今作侵欺追賠民甚不堪上命戶部賑濟虧折馬艸悉免追。

洮州衛所鎮撫陳恭上言外夷異類之人不宜置左右引玄宗徽欽爲鑒禮部尚書呂震請加恭妄言罪上容之

上覽畢以示羣臣曰所言近衛宜嚴甚是但天之生才何地無之爲君用人但當明其賢否何必分別彼此其人果賢則信任之非賢雖至親亦不可用漢武帝用金

日碑。唐太宗用阿史那杜忛。蓋其人之賢也。若玄宗寵任安祿山。播遷之禍。正是不明於知人。宋徽宗自是寵任小人。荒縱無度。以致夷狄之禍。豈因用夷狄之人致敗。朕爲天下主。覆載之內。但有賢才。用之不棄。近世胡元分別彼此。柄用蒙古韃靼。而外漢人南人。以致滅亡。豈非明鑒。禮部尚書呂震請加恭妄言罪。上曰。恭之心。本是忠朝廷。但未深思耳。豈可罪。朕恒語卿等。言事之人。有乖謬。當容之。罪之。則言路塞。人君無由得聞善道。爾爲大臣。此言亦非忠矣。

乙巳。考郎兀衛千戶兀魯不花。乞於北京居住。從之。賚予

循例



修廣西潯州衛城池。

浚鎮江京口新港甘露三港達于江。

遼東都指揮同知兀凱等奏建州居住指揮字速趙歹都  
劉伯顏等乏食。命發粟賑之。

十二月壬子朔復命工部尚書宋禮祿木四川。

平樂蠻賊莫彥恭等聚衆劫殺良民廣西都指揮葛森奉  
命勦平之。

甲寅擢監生劉端爲戶科給事中專掌北京皇城門勘合。  
修靖海縣至青縣河隄。

四川安縣言歲徵茶七萬三千三百八十四斤比年茶株  
枯死採納不敷乞茶課折鈔從之。

戊午。勅武義伯王通。天壽山夫匠得代者。令原管官領回。有司給行糧。病者予醫藥。

癸酉。勅宣府總兵官武安侯鄭亨等。今阿魯台移近開平。遣人來貢。須謹備預防之。

保定府安州奏水決直亭河口。乞起夫修築。命候春暖築之。

甲子。暹羅國王昭祿羣英哆罷諦刺遣坤文琨等奉表貢方物。遣中官洪保等往賜其王文綺羅帛。

丙寅。勅寧夏總兵安遠侯柳升領兵還京。陝西大同調用者。令還各衛。

烏思藏尚師昆澤思巴來朝。先遣人進舍利佛像。

丁卯刑部侍郎張本等言御史張循理擅鞫軍職宜正其罪從之。

己巳以仁孝皇后梓宮將歸山陵命工部侍郎蘭芳通政司右通政樊敬錦衣衛指揮莊敬等沿途預備宿頓治橋道具車船

諭各王府免來京送仁孝皇后葬但遣官來祭

庚午以水災免湖廣黃州常德二府糧萬九千五百石河南中牟河內等縣糧千六百石

辛未修京城各門樓

湖廣華容縣言水決安津等隄防四十六處傷民禾稼功九難成命發旁縣民併力修之

壬申戶部言邳州水災民乏食命監察御史乘傳往賑之。

癸酉勅都指揮使張麟鎮守寧夏。

乙亥詔明年巡狩北京。

勅山東等都司中都留守司直隸揚州等衛選精銳騎士及步卒各委官管領赴徐州等處駐劄候駕扈從山東都司及潼關衛駐德州湖廣都司及睢陽揚州淮安各衛駐徐州陝西山西都司駐真定邳州沂州各衛駐濟寧中都留守司及宿州徐州各駐本處皆給行糧及賜鈔爲道里費。

丙子立春。

上御奉天殿文武羣臣行賀禮賜宴。

丁丑韃靼太師阿魯台遣所部把禿荅蘭兒不花等貢馬二百匹。賜鈔幣有差。

刑部等衙門侍郎張本等劾御史劉翼同掌道御史袁綱挾讐非法考訊兵馬主事李貞致死論以斬罪而御史陳耘知而不舉應徒從之。

戊寅勅甘肅總兵豐城侯李彬勿進兵伐塔力尼。

先是以西寧侯宋琥言赤斤蒙古衛指揮塔力尼匿叛賊老的罕等命翰林侍講楊榮詣甘肅與彬商略發兵伐塔力尼彬謂叛寇固當誅戮但軍行道路險惡難於餽運榮亦謂隆冬非用兵之時且有罪不過數人官

軍所至不免濫及無辜。彬猶豫榮請自歸奏之。既至見上具言所以未可進兵之故。遂勅止勿進。

遣人賫勅諭塔力尼擒老的罕等送來當行賞賚。不然發兵討叛。非赤斤之利。

降安定王尚炆爲庶人。安置泗州。

殺浙江按察使周新。

時錦衣衛指揮紀綱有寵。使千戶往浙緝事。作威受賂。新捕治之。千戶脫走。訴于綱。綱奏新專擅。上命官校逮新至。陛前抗聲陳其罪。且曰。按察司按事與在內都察院同。陛下明詔也。臣奉詔擒奸惡耳。柰何罪臣臣死且不憾。上怒。命戮之。臨刑大呼曰。生爲直臣。死

爲直鬼。上尋悟其寃。顧問侍臣曰：「新何許人？」對曰：「廣東。」東歎曰：「廣東有此好人枉殺之矣。悼惜者久之。」

朝鮮國王李芳遠遣陪臣李從茂等貢方物。賀明年正旦。賞賚如例。

是歲天下戶一千九十九萬二千四百三十六。口六千五百三十七萬七千六百三十三。賦稅三千四百六十一萬二千六百九十二石。

癸未永樂十一年正月辛巳朔日食。免朝賀。

先是鴻臚寺奏習正旦賀儀。上名禮部翰林院官問曰：「正旦日食。百官賀禮可行乎？」尚書呂震對曰：「日食與朝賀之時先後不妨。侍郎儀智曰：『總然同日。免賀爲當。』」

上顧問翰林諸臣。古有日食行賀禮否。黃淮楊榮金幼孜皆未有對。楊士奇對曰。日食天變之大者。前代元正日食多不受朝。宋仁宗時元正日食。富弼請罷宴徹樂。宰相呂夷簡不從。弼曰。萬一契丹行之。爲中國羞。後有自契丹回者言。虜是日罷宴。仁宗深悔。今免賀誠當。上曰。君子愛人以德。不以姑息。其免賀及宴。仍賜百官

### 節鈔

勅諭奸黨齊黃等遠親未拏者。悉皆宥之。有來告者。勿論。時翰林庶吉士錢習禮。江西吉水人。與練子寧有姻婭。先是逮治奸黨。習禮偶獲免。而恒爲鄉人所持。習禮不自安。以告學士楊榮。榮乘間以聞。上欣然曰。使練子



寧今日在此朕固當用之況習禮乎卽日下令禁止於是奸黨漸解

二月上巡幸北京皇太孫從命戶部尚書夏原吉學士胡廣庶子楊榮諭德金幼孜扈從吏部尚書蹇義學士黃淮諭德楊士奇洗馬楊溥輔皇太子監國

設貴州等處承宣布政使司及思州新化黎平石阡思南鎮遠銅仁烏羅八府

洪武中止設貴州思南思州諸宣慰司思州所轄二十二長官司思南所轄十七長官司仍設都指揮使司鎮守其地及思南宣慰使田宗鼎與思州宣慰使田琛數相攻殺抗拒朝命乃勅鎮遠侯顧成以兵擒之命戶

部尚書夏原吉等議分設長官司爲府。

三月田琛田宗鼎伏誅以工部侍郎蔣廷讚爲貴州左布政使。

四月諭禮部尚書呂震今後司府州縣官至京所言有切民情治理者宜旌賞之否則重懲勿貸。

諭曰朕嘗命布按二司及府州縣官至京者陳民間利病近有以時和歲豐民安物阜爲言者及驗視之田野荒蕪人民饑寒蟲蝗皆不以聞朕已寘諸法。

五月癸未端午節車駕幸東苑觀擊毬射柳聽文武羣臣四夷朝使及在京耆老聚觀。

自皇太孫而下諸王大臣以次擊射皇太孫擊射連

發皆中。上喜。命儒臣賦詩。賜羣臣宴。及鈔帛有差。交州比江府土官陳麻歷阮必恭等及耆民百有八人來朝。悉賜鈔遣還。

麻歷等自言交趾之人。久被黎賊荼毒。荷王師滅之。民獲蘇息。故詣闕謝恩。

山東曹縣復獻騶虞。禮部尚書呂震奏稱。上瑞請率羣臣表賀。詔不許。

上曰。百穀豐登。雨暘時若。家給人足。此爲上瑞。騶虞何與民事。不必賀。震固請。上曰。大臣之道。當務爲國爲民。汝能效李沆爲人。則善矣。震退。上顧侍臣曰。震可謂不學無術者也。

六月。開平備禦郭虎奏兵少不足守備。以在精不在多。勅報之。

勅曰。爾能撫卹有道。訓練有方。雖千人亦足用。軍多不精。徒耗糧餉。無益也。

七月。封韃靼太師阿魯台爲和寧王。

先是。馬哈木滅本雅失里而立峇里巴。阿魯台來附。故封之。

八月。遣吏部員外郎陳誠偕中官李達使西域諸國。

先是。西域火州于闐哈烈亦力把力諸國皆來朝貢。乃遣誠等賫詔幣往諭。資於其國。宣布朝廷德威焉。

十月。山西緣邊烟墩成。

十一月。瓦剌三酋叛。

以野蠻絲制衾。命皇太子奉薦太廟。

先是山東民有獻野蠻繭絲者。羣臣奏賀瑞應。上曰。此祖宗所祐也。特命織帛染柘黃。制衾以薦。

十二月。英國公張輔等大敗賊兵於愛子江。擒陳季擴。檻送京師。

時輔偕沐晟等進兵順州。賊黨阮師等屯愛子江。設象伏以候官軍。輔偵知之以戒先驅。羣象來衝。一矢落其象奴。再矢披其象鼻。奔還賊陣。自相蹂踐。官軍乘之。賊大敗。斬賊將阮山。生擒僞將軍潘經等數十人。賊衆死者無筭。季擴走追擒之。餘黨悉降。交趾復平。

甲午永樂十二年正月丙子朔日食免朝賀。

壬申大祀天地於南郊。皇太子代行禮。

二月。上朝退坐右順門。所服裏衣袖敝。納而復出。

侍臣有贊聖德者。上嘆曰。朕非不知三公布被之議。

但念當惜福。昔皇妣躬補緝故衣。皇考見而喜曰。

勤儉如此。正可以爲子孫法。故朕常守先訓。不敢忘耳。

爾等慎勿諛也。

詔親征瓦剌胡寇。答里巴馬哈木太平把禿孛羅。

先是朝廷封阿魯台爲王。瓦剌馬哈木等怨焉。自是朝

貢不至。遂議親征。命安遠侯柳昇領大營。武安侯鄭亨

領中軍。寧陽侯陳懋。豐城侯李彬領左右哨。成山侯王

通都督譚清領左右掖都督劉江朱榮等爲前鋒。

三月設隆慶州并永寧縣隸北京行部。

隆慶古緡雲氏所都之地金置緡山縣元仁宗生於縣東改爲隆慶州國初移其民入關內州遂廢至是以其路當要衝土宜稼穡改爲隆慶州又設永寧縣隸焉以其罪當遷謫者實之。

庚寅車駕發北京皇太孫從之。

上謂侍臣胡廣楊榮金幼孜曰朕長孫聰明英睿智勇過人今令待行俾知用兵之法且使躬歷行陣知將士勞苦然文事武備不可偏廢管中稍閑爾等卽以經史于長孫前講說庶幾有益。

辛卯。發清河。午至沙河。命光祿寺賜侍臣酒饌。  
癸巳。至隆慶州下營。

時馬步官軍五十萬俱集。

甲午。至懷來下營。

戊戌。車駕次宣府。

壬寅。車駕發德勝口。度野狐嶺。

四月甲辰朔。駐蹕興和。五軍盡出塞。

丁未。命庶子楊榮兼掌尚寶司事。

由是凡號令與傳宣之事。勅旨。旗牌。非榮奏允。不敢發。

己酉。大閱軍士於沙城。

甲寅。車駕次凌霄峯。



卽元出於伯嶺。

乙卯。次大石鎮。召問庶子楊榮。足食足兵之策。榮進對。上嘉納之。

榮曰。宜慎擇將帥。竭力屯田。將得人則撫馭有方。軍士安。則耕不違時。不患食不足。兵不精。上是其言。

丙辰。車駕次五雲關。

卽哈刺罕。

戊午。車駕次高平阜。

卽忽牙撒里禿。

己未。車駕次殺虜城。

卽谷魯城。

丙申。車駕次龍沙甸。

卽阿蘭腦兒。

甲子。車駕次清水源。

卽馬塔馬。

五月癸酉朔。駐蹕楊林戍。大閱武。

上閱武之暇。皇太孫侍。語及創業守成之難。上曰。

前代帝王多有生長深宮。狃於富貴安逸。不通古今。不識民艱。經國之務。懵然弗究。而至於亡者。朕嘗以之爲戒。汝將來有嗣統之責。須勉力學問。於凡天下之事。不可不周知。人之艱難。不可不涉歷。聞見廣而涉歷多。自然心胸開豁。于萬幾之來。皆有以處之。而不差矣。如此。

非惟不負。祖宗之付託。亦有福澤被及下人。勉之勉之。

辛卯。車駕次廣武鎮。

卽哈刺莽來。

癸未。車駕次玉帶川。

卽紫禿。

甲申。車駕次富平鎮。

卽兀兒禿。

六月壬寅朔日食。

甲申。車駕次雙海泉。

卽撒里怯兒。元太祖發跡之地。舊嘗建宮殿及郊壇。每

歲於此度夏。西北山有三關口。通飲馬河土刺河。胡人常出入之處。

乙巳。下營雙泉海。前哨馬來報遇胡寇數百人。稍與戰。皆遁。

甲午。前鋒都督劉江殺敗胡寇於三峽口。

卽康哈里。

宵遁。

戊申。發蒼崖峽。大勦虜寇。峇里巴及其三酋于急蘭土刺河。賜名殺胡鎮。

初七日晴。午次急蘭。忽失溫。賊首峇里巴同馬哈木太平把禿孛羅掃境來戰。去營十里許。寇四集。列於高山。上可三萬餘人。每人帶從馬三四匹。上躬擐甲胃。卽官軍精銳者先往。各軍皆從後至。整列隊伍。與寇相拒。

寇下山來迎戰。火銃四發。寇驚棄馬而走。復集于山頂。東西鼓譟而進。寇且戰且却。將暮。上以精銳者數百人前驅。繼以火銃。寇復來戰。未交鋒。火銃竊發。精銳者復奮勇向前力戰。無不一當百。寇大敗。人馬死傷者無數。寇皆號痛而往。宵遁至土刺河。上乃收軍回營。已二鼓矣。

庚戌詔班師。

上麾柳昇等發神機銃砲。斃賊數百人。親率鐵騎擊之。虜大敗。殺其王子十餘人。斬虜首數千級。餘衆敗走。上還帳中。皇太孫入見。上語以虜敗之故。皇太孫叩頭稱賀。上曰。此虜尚未還。夜中尤須慎防。遲明。

追撲之必盡殲乃已。皇太孫對曰。陛下督戰勞。天威所加。虜衆破膽矣。今旣敗走。假息無所。寧敢返顧乎。請不須窮追。宜及時班師。上然之。

壬子。師出三峽口。餘寇復聚峽口山上。及數百人據海子。諸軍以火銃擊之。悉遁去。

戊午。駐蹕三峯山之西南。和寧王阿魯台遣所部都督朶兒只魯卜等來朝。命中官王安齎勅往勞之。

朶兒等言。阿魯台有疾。不能造朝。上遣使賜賚甚厚。是役也。內侍李謙恃勇。引皇太孫于九龍口迎戰。幾危。上大驚。急追回大營。謙懼罪。自經死。

己巳。車駕次黑山峽。勅皇太孫以班師告天地宗廟。

社稷遂頒詔天下。

七月丙午。車駕次擒胡山。寫平胡詔。遣都督指揮李英同中官賁回北京。

癸巳。駐蹕宣府。

己亥。駐蹕沙河。皇太子遣兵部尚書金忠指揮楊義進迎鑾表。

八月辛丑朔。文武百官迎。駕由安定門入。

上御奉天殿受賀。大宴文武羣臣及從征將校。命禮部會議將士功賞。

交趾總兵官張輔檻送賊首僞大越國王陳季擴。及僞國公阮師等至京伏誅。

應天府奏鄉試中式舉人謝瑤等二百名。

九月。令支運轉漕。

楊葛刺國王賽弗丁遣使奉表獻麒麟。禮部尚書呂震請上表賀。勿許。

上曰。卿等但當夙夜竭心輔治以安天下。天下旣安。雖無麒麟不害爲治。其免賀。

閏九月。遼東官輔導尚書蹇義學士黃淮諭德楊士奇洗馬楊溥芮善司經局正字金問等至中途。尋宥蹇義回京。師下學士黃淮等於錦衣獄。尋釋楊士奇復職。

先是。上以皇太子所遣使迎車駕緩。且奏書失辭。曰。此輔導者之不職。遂徵黃淮。是日淮先至。諸司交



奏其罪。遂下獄。後二日。楊士奇及司經局正字金問至。上曰。楊士奇姑宥之。朕未嘗識金。問何以得侍東宮。命法司鞫之。已而召士奇至前。親問東宮事。士奇叩首言。殿下孝敬誠至。凡所稽違。皆臣等之罪。上悅而罷於。是行在部院。諸司交章奏士奇罪不宜獨宥。乃下錦衣衛繫之。未幾。特有復職。遂徵楊溥。芮善相繼下獄。皆以金問辭連之也。

十月。江陰侯吳高以罪免爲庶人。

初。高領兵守大同。多不法。及上北征。班師至興和高。稱疾不朝。波名回京。縱家人給驛及私役有司車牛。又擅以守邊官軍千百戶鎮撫張玉等百二十餘人隨行。

所過騷擾爲御史成務等所劾遂免之。

十一月甲午朔日食。

降晉王濟燔爲庶人。俾與長子美圭同守晉恭王墳。

勅諭曰。爾謀爲不軌。自絕於天。自絕於祖宗。論爾之罪。有不容誅。重念恭王手足之義。特全爾生。令守恭園。其閉門念咎。杜絕外交。改過遷善。以保令終。慎之哉。

甲寅。諭學士等官胡廣。楊榮。金幼孜。纂修五經四書性理大全。

諭曰。五經四書皆聖賢精義要道。傳註之外。諸儒議論。有發明餘蘊者。爾等采其切實之言。增附於下。其周程張朱諸君子性理之言。如太極通書西銘正蒙之類。皆

